



志壑堂集

十三

和
1080
13



門和 16
籍 1080
卷 13



志壑堂詩序

爾雅曰序緒也文籍之有序昉於書詩書不具論詩
大序或謂作於孔子或謂作於子夏小序或謂作於
子夏或謂作於衛宏或謂作於毛公伊川程氏斷以
爲出於國史之筆而鄙陽馬氏則謂讀國風諸篇而
後知詩之不可無序又以爲聖人之刪詩其見錄者
必其序說之明白而旨意之可考者也其軼而不錄
者必其序說之無傳旨意之難考而不欲臆說者也
序之有功于三百五篇如此晦菴朱氏欲以鑿空之
見廢之終不可得也後人結集文章例必有序蓋本
於大小序之義而呂伯恭謂序文籍者當序作者之

意夫苟不通知作者之意則不如其勿作耳矣翰林
檢討唐先生在

世祖朝以史官抗疏言事罷歸其言直斥臺諫之非分
別白黑言人之所不敢言當時以爲好名者有之以
爲出位者有之然國家事臺諫不言則侍從言之古
者諫無專官庶人傳語百工執藝事而况於文學清
切之臣乎先生罷歸四十年鍵戶讀書不以身之放
廢而忘君父於凡國計民瘼利病休戚皆借箸而
籌之可見施行又究極朱陸同異之辨旁及二氏之
說皆務窮其波瀾而詳其指歸扁舟襍被攬奇勝於
吳越章貢之間者數年而後歸息乎般水之陽蓋先

生之胸中浩浩然落落然如雲之行於太空如風之
行於江海隨所寓而發之而未嘗有所執也故其文
近於蒙莊而其詩近於東坡讀者欲以拘墟之見尺
寸而測之失其意矣予於先生爲詞林後進阨相
接辱先生知交最深自謂能通知作者之意故定先
生集竟而述之編首以竊附於詩之大小序云

康熙辛未中秋

賜進士通議大夫兵部督捕侍郎

經筵講官

三朝國史副總裁前都察院左副都御史詹事府少
詹事兼翰林院侍講學士國子監祭酒新城王士

正序

志壑堂序

余嘗欲條疏古今賢臣建言分而爲三彙成一書三者一曰宰相一曰侍從其一則諫官也蓋古者諫無專官所最重者宰相有輔導之義侍從有啓沃之任其責重與諫官等耳獨怪今之言事者專以其責屬之臺省於輔弼講讀之臣未有所與焉而爲輔弼爲講讀者亦遂弛然自寬以爲非我之所有事使諫官之能盡其職天下之事有諫官所不能盡言者矣而况今之官名爲諫者其能盡其言責者十之一其不得盡其言責者恒十之九而能盡其言者其言之又有行不行者嘗少而不行者嘗多也然則如之何

志寧堂詩集序
而不以責諸宰相與侍從者也順治間有
詔命詞臣修玉匣記_臣佻帝化書時則檢討
武唐先生上言以爲不宜崇此非聖之書妄費紙筆
爲

聖學玷又爭御史張煊給事陰潤事忤
旨歸里

本朝之能以翰林共諫職者自檢討始從此考槃般
水之陽垂三十年發憤著書多忼慨沈鬱之旨或謂
先生非身絀而道困則不能昌其文以自列於後世
既先生訪友四明橐其文數卷以示予予讀其經世
之言所爲籌餉積穀銅鈔改漕之法訂謨碩筭鑿鑿

皆可見之施行其文字明白愷切亦與賈長沙陸宣
公相上下惜其雖能言不得試之實用且言之用不
用命也並不得自見其言於朝以待有力者之言而
舉行之焉良可悲矣則夫以先生之文爲窮而始足
自列於後世者豈足知先生之志者哉先生當放廢
之餘汲汲然以天下生民之事爲已憂顧其中若有
所不暇於天下生民之計循是以往斯民之患將安
息乎此余之所以不禁三太息於斯文也慈谿後學
姜宸英撰

阮亭選志齋堂詩集目錄

卷之一

五言古

十三首

卷之二

七言古

二十七首

卷之三

五言律

四十五首

卷之四

七言律

九十二首

卷之五

七言律

七十六首

卷之六

七言律

一百八首

卷之七

七言律

三十二首

卷之八

七言律

九十七首

卷之九

七言律

六十首

卷之十

七言律

四十八首

卷之十一

七言律

三十五首

卷之十二

五言絕

十五首

卷之十三

七言絕

五十一首

卷之十四

七言絕

六十四首

卷之十五

七言絕

二十五首

志寧堂詩卷一
自冬及春雨艱貴俸金汁不願丹砂成但願肝陌濕
卽今瞻四郊麥秋竟何得山國十餘年無如此歲急
隱憂在空倉餘粒惜豚鴨端坐望雲漢不忍發尊罍
有客北方來聞道千里赤天意不可知民瘼宜早白
年來休養功家纔完衣幘剜瘡供官糧猶同隣里泣
豈堪春夏交坐見饔飧缺何況禁網間時時有暴客
杞人誠何知無端千慮集

王阮亭曰仁人之言哉

歲月習清齋入口怪麩汁雖云暢榮衛畢竟傷胃濕
微醺憶堯夫自計聊云得休糧卽未能此物誠何急
矧以口腹微無故災鷄鴨畢命在刀砧椒馨透蒸爨

擊鶻岩穴驚投網水族赤我昔遊海上螺殼如山白
何似籬落間飛啄鳴絳幘但恣七箸歡不聞造物泣
試叅玉版禪盤餐亦無缺奈何輕殺業漫云供賓客
慎哉命庖厨寃重百疴集

阮亭曰宋人詩云秋來霜露滿東園蘆葍生兒芥
有孫我與何曾同一飽不知何苦食雞豚與此詩
當並書座右

田家供天儲粒粒皆血汗饋餉起千艘汲水添江濕
海上垂多緡罪鯨何日得廟謀三十年觀成此時急
豈無懸瓠城雪夜亂鵝鴨咄哉師武臣滅此後發冢
凱歌露布稀微餉羽書赤以海而攻海此策人曾白
繞朝祝緩征大農憂脫幘飽騰近何爲徒令農夫泣

金城十二策屯戰食無缺軍不自食力主兵反爲客
豈有緩帶者坐看輪輓集

阮亭曰五字
何減趙克國

猶吏職筦庫鼎沃函牛汁司鑰巢穴之漏卮不覺濕
剡新以補舊彌縫計亦得一朝行借支無怪其窘急
大者攫蒼鷹小者飼欄鴨雲厨支空釜不堪揭其簞
借支舊有餘其如雙手赤祇對且模稜聊以免曳白
如彼髡首者憚人脫乃幘阮亭曰
失笑畢竟恃新支但飲
窮簷泣否則襟肘間度支得無缺慎哉守倉庾但宜
如過客桑孔長子孫致使雀鼠亦

張歷友見貽將入長白之作奉答

學道不及時攬鏡青髮白浩蕩乾坤中駐顏無良策
畢竟五嶽雲不改千年碧人生卽尙平能着幾兩屐
吾家長白山橫亘烟鬟隔不見范秀才鹽粥常托迹
剝啄鎮相關幼安應割席高卧亦良佳寧必注仙籍
芳艸萋幽塘聊可承朝夕白社憶遠公宗雷風久寂
何妨禮瞿曇鐘餘惟面壁一日此跌跏三生滌塵積
崑崙有山人咄嗟賦行役如鶴唳九臯俗累乃水釋
於世非羊裘虞夏吾安適楚唄與書聲何期對嘉客
流水咽危崖蔓蘿施嵌石單椒望錦秋漫漫雲夢澤
跬步而失之此生一可惜魚遊與淵謀鳥棲與木擇
安事五侯鯖已收十斛麥坐嘯亦行歌披襟復脫幘

有時偃北窗涼颺何械械有時拂丹崖吐句鳴泉瀉
服食刷黃精辟穀啖紫栢金珀及朱苓千歲結松魄
九還就鉛鑪三車引鹿春相對坐吹笙霞舉一何易
西州問北邙臨風徒惻惻貧子而衣珠匹夫而懷璧
嗟哉賢進冠呵殿手可炙南畝箬笠寒東市朝衣逼
太息念少年雙輪一何迫張子千里駒閉戶探史冊
錦帆破長風大業良難測余病已倦遊駕言依古德
便當問招提三徑爲子闢

同社文會次喜雨二首

舊農怨穀賤新農怨雨遲帝意兩哀之雨及麥秋時
無稅長吏怒無穀婦子悲馳告五湖長颺爾展靈旗

脚杖走無聲竟夜得淋漓砌花折初甲簷桐引故枝
嬾僕不可策晨起花自移而况貧山人其樂寧可支
隣肆初煮酒將與友共之吾友傷如焚久齋夜祝釐
涼颺自南來請君俯一卮

阮亭曰
似坡老

讀古梯榮耳吾黨在絕學夏木老陰合下帷謝剝啄
庭有二三子鷄鳴紛喔喔濂洛相探討經史共揚摧
道衰子思憂家貧顏子樂疏泉疏其原瓊玉攻其璞
功利嗟已紛典刑嗟已邈狂瀾而東之五鹿豈嶽嶽
濟上歸念東先生贈詩見詢用韻奉答

野望披金風揮鋤當農隙遙想嵒華間兩峯對蕭瑟

長歌策蹇來浩蕩城陰直彌勒卜同龕瓦枕板扉窄
佛火雜魚燈經唱鐘聲息夜聽水龍吟梵志人非昔
絃誦魯諸生紈袴兼黃馘鼓篋復三年上書陳一得
晨昏鎖院開雜沓佗壇側携瓶復承筐袒褐容蔽膝
或英如終軍請纓許報國或醇如江都爛熳天人策
跼踏號舍中伏首恣探牘往復雖多賢黃冠逢竒客
沽酒豐樂樓買卦君平室菜圃水木交想見古阡陌
芙蓉北渚亭一聽霓裳拍東流水館前困鱗繫盈尺
湖墅與龍山幸無人聖壁酌泉江家池不聞黃鶴跡
蕭寺放生文專待燕許筆昨澤及禽魚道路傳嘖嘖
稷下凡幾年未見此功德礪碑紹先賢約社起新則

崦嵫能幾何回首雲已黑小果雖偶成如晞髮初櫛
宿願久不償如妬衣弗漬努力須及時匡坐感胸臆

卽事

南風拽緯行高卧良不惡忽聞破浪聲歡言北風作
岸草一披靡長音振林落鷓首矯若龍烏檣輕似鶴
長年更事多當行忽且卻不復語諸人但云卸蓬脚
君看急流中幾許前賢錯

阮亭曰偶然之
語可銘座右

岸草與溪長帆勢隨溪轉連日竹纜牽舟子雙纏繭
我起坐明窻罷書惟搔癢同舟此快風直使無愁遣
秋樹寺崔巍秋花水清淺天道自好還人事有舒卷

鄭重守蓬人箇事君專典

題孫孝則四世圖

隣桑寄玉環僧瓷留故紙如水之與泡多生彈指耳
禪靜中諸幻識滅有此理纍因不足悲令僕不足喜
墮地原非生蓋棺亦非死若作宿命通竊恐為魔使
若見相非相請自今世始不然十七史從何處說起
吾生信有涯泡息還為水龍華會中人再拜眉休子

阮亭日根器元近玉局翁遺語亦通肖

和張明府

青女恣嬉遊老龍耽春睡三月輟扶犁田父潛憂悸
或云緣秋霖此早闕天意又云年屢豐寧能諱災異

我侯切痾瘵除壇為神位蠲沐霽不眠曉起却輿騎
闐闐千萬家維時猶夢寐秉炬鯨鐘鳴陳幣祝詞秘
是日徹帝闈馬鬣救群吏雨師倏以驚倉星整雲轡
鬣鬣颯靈旗惠雨須臾至西窻響淋零南陌潑青翠
喫酒何足云隨車理能致不為使君賢豈能承天賜
余昨病北村欵段渡河陸來牟欣有秋良田將時植
盼胙豐十脰大嚼徒抱愧好作喜雨歌伐石勒巖巖
循吏增秩金亦祇平常事願以告寰區人神隔無二

[Faint bleed-through text from the reverse side of the page]

阮亭選志壑堂詩卷之二

七言古

淄川 唐夢賚

泰山歌

泰山差勝長白耳坡陀何曾四十里翠輦不來御路
殘五松已老大夫死吳門匹練事荒唐秦碣穹窿無
道理後人割磨昔人碑開山鑿破青山址願酌北斗
倒銀河淨洗乾坤反其始

看日出歌

日觀峯頭看日出聞鷄蹴起不暇沐凌空一杖坐單
椒但見闔闔深鎖雲填谷此時羲和睡正酣龍宮高

挂扶桑轂少時海東散微霞山脚明河顛拖玉赤城
爛慢色漸驕粘天橫練千層綠同遊大叫真竒絕朱
鏡誰家忽出匱一時倏變珊瑚鈎噴焰三角紅髻蹙
此時只在平地白雲中卻隔海天尺五六須臾全現
丹砂盤虞淵一躍湧天腹昔年看日二勞山海涯更
覺駭心目白榆歷落晃銀灣寶柱一道搖金燭蜃城
隱見經幾時回頭兩度開黃菊少壯幾何白髮催東
望再拜申微囑總此乾坤無盡時六龍飛轡何須速
何不紫縛三足鳥高縮天樞膠地軸一輪便碾三萬
年掉鞅蘇門少拘束胡爲乎奔馳若木又咸池叱馭
晨昏空碌碌

醴泉寺用韓退之南谿韻

豹山之曲層巒裏北望長白連翠微柱礎占雨甕
濕不如山髻青練飛雲旗旆旆雷師走頃刻灌我禾
稼肥山陰范子讀書屋與此山稱兩稀至今丘壑
閉關者埋金寧肯耽朝饑此公鼎彝今已矣哀泉
梵月關僧扉昨日遊山卧道閣龍鱗老樹大十圍
臨階活水聲瀲灩當窻松影雲霏霏雨後瀟湘屏
十二菜畦遙挂水田衣攢眉白社不可佳夕陽西
下連征鞵藤蘿彌谷榭陰合席帽吟鞭何處歸

阮亭日似承
叔摹退之

贈笠雲閣主人並呈念東先生同歸孝儀賦

平山堂下古邗溝連甍臨水架朱樓記得放船花十里蕪城不見使人愁般陽城外笠雲閣瑣闥千山雲萬壑青鞵出郭樹蒼鬱紫騮嘶風石罍約主人開閣坐胡牀高柳鬢髮冰雪涼梁園詞賦江南客美酒千鍾錦瑟傍畫橋長舫橫綠野歲歲年年醉春社白雲行酒小蠻歌紫山捲幔斜陽下斜陽撲座芰荷香舫艣新茶薜荔鄉紅牙按拍成潦倒蔚藍天地入蒼茫江南無山北無水鑑湖一曲良堪死丈夫老大不爲歡局促轅下徒爲耳我欲作歌銘白髮片帆漫向維揚發雨歇但攜枕簟來莫復中宵負明月常侍先生憶昔年酒帘新句遍妖鬟借問山中金鑿落何如衙

散錦連錢高閣使君雙鬢青酒闌仔細聽銀箏一砌尺檄河陽道溪橋入夢太愁生

心太平菴硯歌爲通州守畢載積賦

狼山舊索陸研銘此債積逋十年久探竒偶過綽然堂顧盼不覺詩思陡世間銀粉與吳鉤娥眉劍客遇非偶車渠筆格渭南船珊瑚鐵網漁翁手鸚鵡雙射碧龍吟隴糜憶對黃藤酒研理宜堅而勿強研心貴澤而惡溜出水依然太平菴將母太平乃不朽君身前是陸放翁幾劫今爲崇川守所以獨喜務觀詩黑頭早作太平叟次律僧瓷叔子環三生澤畔還知否塵海百年堅此銘牙籤莫負平心友我願硯池挂太

山更祈硯杓酌北斗潑墨狂呼賀太平心到羲皇我
何有

青蘿洞行

東蒙居士紫霞翁起居不與世情同別館崇臺住不
得蒼崖鑿破張穹窿洞前流水清如玉荳花桑樹柴
門綠柳將溽暑碧溪東籬邊但許雙鷗浴鑑湖一曲
種荷花湖岸陰陰萬柳斜行人坐卧不能去惟云河
上老人家似浮雲身似寄外人那得知其意玉井
金欄一鬪棋羊腸蝸角皆兒戲志壑堂前笋成竹洞
閣芙蓉開簇簇村酒不辭似蜜甜可惜流光如轉轂
君不見武林詞客桐城老回首山原悲宿草又不見

諸公金紫風中絮一揮狼狽青門去刈麥人忙小巷
空閒齋不定雨兼風午前絳樹流晴日午後清樽對
落紅

余晚歲種竹頗得法樹百手自爲山各相矜詡

念東先生云是可記也乃作歌

城南萬疊芙蓉山城中千箇琅玕竹山轉逸樓風滿
廊竹生志壑雲遮屋空庭崢嶸影迢迢芳砌檀欒聲
謾謾君到開樽醉竹根我來携簞眠山麓雨霽曉粧
畫遠眉天寒翠袖臨空谷諸峰拱揖似兒孫新筍崢
嶸如仲叔我有一言爲君賣平泉梓澤皆小築合圍
千霄皆樸樾君不見山有豺虎竹有蠹麥秋無麥千

家哭尚平五嶽且遲遲阮籍諸賢空碌碌竹裏吹笙
赤鳳來山頭與雨青巒沐此君揭葉撼天關他石谿
猗撐地軸家家竹樹報平安處處山泉響飛瀑有時
叢桂遍岩阿從君二華三天竺

袁松籬秦鏡歌

秦宮寶鏡高五尺離館煌煌秋水碧當時六國曉奩
開九天簾捲繁星射忽傳隆準自東來皎紉掩泣君
啣璧一時封閉待重瞳楚漢曾窺貌不同垓下覽罷
虞兮哭慚無面目過江東此後銷沉滄海岸流傳君
手爲君玩桑田清淺幾多年不知晉魏何云漢入君
手爲君嘆阿房照胆成虛筭先秦但許照蛾眉前庭

鹿馬何曾看

獨酌放歌

海內吏治誰最良北聞益都南武康海內吏治誰最
苦久聞齊東徐明府國珍益都王令綽讀禮歸父老
卧轍共牽衣三日素車不得去荒原揮淚雨霏霏武
康作令韓公子逢麻少年辛苦山城裏上馬殺賊下
論文四郊嘖嘖賢聲起齊東倒篋賂民糧無子無妻
死異鄉齊人傾國營高塚哭聲聲與清河長

羊流店

天門日觀秋風起來過折臂三公里緩帶輕裘事已
非酒人解說羊叔子墮淚沉碑亦偶然雙松尺碼自

年年借使襄陽耆舊在何如杯酒醉生前

王休徵廟

假館主人坐談笑謂我兩歇宜登眺伴城東南繞孝
河河邊孝子王祥廟老槐古栢勢參天青蒲紫莢堪
垂釣當其卧處冬不冰鬱蒸三尺清如燒門外淋漓
雨不收欲往從之但清嘯臨食輟箸重歛歔湯泉火
井定何如却笑蘇秦主父偃輕將恩怨較親疎

諸葛故里

人生遭遇偶然耳卧龍強爲三徵起五畝茅廬八百
桑他時身退期歸止吳魏英雄孫仲謀霸圖草就聊
爾爾白帝城高八陣寒將星墮落人如此陰平不守

劍門開子孫戰歿降王喜嘔血徒爲水鏡嘔抱膝高
吟良已矣南陽故業不歸耕海嶠空傳諸葛里嗚呼
回首伏波下澤車長源貶謫青田死諸君仙骨且蹉
跎餘人瑑瑑何能齒芝草東園綺里公桃花西塞佐
真子掉臂長歌歸去來人生遭遇偶然耳

傾蓋亭再題壁

重來孔子聞官路來看殿壁曾題句白鷺群飛舊種
田青帘還掛臨街樹道人爲我前致詞殿後將修大
士祠普陀巖上蓮花座祇樹園中楊柳枝我向道人
重致語世間百事有緣起此殿前宜享聖人後宜鄰
子與程子主賓於禮最相宜衣冠胥爲佳耳大士

志靈堂詩卷二
靈祠通十洲神鴉社鼓歲無休不應凡聖交叅處混
雜龍蛇共九流

塞海門

黃河浩浩來萬里龍門積石何時止當日九河俱北
流冀州毫都屢遷徙今日驅遣與淮通東使迎漕非
本旨岷峨諸山爲江源英霍諸泉爲淮始江湖合併
勢滔天東流就下歸揚子秦湖餘雪下姑蘇尙屬細
流不能比廟灣之間立海門前賢創作奔濤砥海潮
來閉江潮開諸水東歸皆瀉此前年遷海初塞之一
時原爲防海起詎知一塞不可開江河怒鬪河身圯
司空日夜蕩黃金誰說海門惟禁齒江河壅遏高於

山淮安城伏狂瀾底東去高竇四五城年年不得保
桑梓西風一浪高堰崩漕艘安有飛如駛河伯逆流
又無歸簫鼓金龍徒享祀譬如有人閉尾閘日昏醉
飽其人死假使神禹爲河臣問水之性此何理早晚
但能開此門勿徒伎倆陳空紙挑則真挑修真修卽
今閩海平於几草野今聞開汴河田夫恐懼舟師喜
大抵河水若繆龍不可繫縻如臂指逆水之性祝效
靈汴河雖開徒爲爾勢必金堤棄不修重歸馬頰與
太史坐使黃流奔九河恐護神京策非是

金家梁

病容漸減頰看鏡丈夫不死還高詠闍黎兩月守毘

尼水神蝦虎鱸魚松江名蝦虎交相慶漁唱聊當著反騷雄
文何敢爲非孟生前杯酒死後各正寢路葬皆由命
三十六宮飛燕身二十四考中書令石馬嘶風翁仲
寒蛟碑斷折麒麟病吾園拱把竹成林小山籬落遙
相映歸來酒熟臘梅開微臣時復一中聖

阮亭日又效於萬
八千戶冠軍侯矣

呂芳生畫山水歌

呂子爲余作三畫其一踏雪騎驢來山中其一錦幘
朱節臨於越其一高牙大纛下天雄寸馬豆人各奇
絕林莽烟水探無窮余持三畫歎不已怪其筆底開
鴻蒙遠人無目却娟秀遠山遠樹皆鬱蔥乍似神駿

遊八極大者爲鶴小沙蟲憶昔相逢臨沂水茅店擁
爐出一紙細潤雲巒鐵線皴大呼唐寅今可起呂子
聞之爲破笑似許吾言知畫旨於今吳越畫家凡幾
家田叔章侯皆已死衡山之後有幾人圓照烟客石
谷三王子石谷之徒顧苻文蔚然後出爭壁壘與君
馳驅並中原右執秦鞵左鞭弭爲我更寫五嶽之真
形處處置我山岩裏僕雖老矣故倦遊尙能布襪青
鞋從此始

送呂芳生之壽光兼寄魏中翰

揚鞭東指青淄渡牛山蒼翠紛無數金嶺驛館小傾
卮纍纍遙指田齊墓田齊無復古臨淄揮汗肩摩總

非故一問夏王樹灌城三宿孟軻徘徊路大梁公子
魏無忌結客燕臺恭執轡卽今刮目老候嬴田光朱
亥皆能致公子城南甲第遙橫塘綠樹百花橋煩君
寄我蘭亭本莫忘山人詩滿瓢

送祖珍禪師掃塔

泰山七十二芙蓉蒿里山下泉淙淙石堂巖業三層
屋北種蓮花南種松憶昔淳沱垂一綫笑巖老子潛
京縣小絲九鼎放光明於今糾糾兒孫遍壅堵波峻
起 先皇辛苦石堂一瓣香芒鞋斗笠乘乾水莓苔
掃罷淚浪浪傳言東照石堂老抽身燕市歸來早鶴
嘯猿啼不可留歸餐黃獨拾瑤草泰山東下見般陽

青石關高孝水長蒼梧翠竹茅亭好來徃風流志壑
堂堂西開徑起荒菴彌勒頭陀共一龕三家同異間
商畧拄杖桃花且罷叅莫分李釋與周孔小儒門戶
憑懔懂浮生支許事如何要離墓近梁鴻冢

明湖館題壁和王太常子下韻

蘭橈點破萍花碧柳絲蘸水漁蓑濕湖氣欲沒夕陽
紅綠陰乍斷佛山出波心亭館蔭芙蓉波間鷗鷺相
離卽拂塵醉讀故人詩華表鶴聲如有失

汪蛟門百尺梧桐閣圖

平山堂下紅橋路重來猶識扁舟渡烟水南詢憶昔
時名園北郭紛無數汪舍人詞華久百尺高梧千斛

酒錦瑟雙鬟一發聲練裙斐几墨如斗紫微省岫嘖
書神仙自古愛樓居我家竹樹千岳裏春到梅花定
不如

題顧苻文所作志壑堂圖

費山之麓樹一簇中有豹岳讀書屋有時炙背或曝
腹欹枕松風起謾謾探訪花源問訊竹久客湖光如
轉轂何事吳山空碌碌顧虎頭寫此幅携之露餐復
風宿掉臂長歌歸去來莫待紅衣搖落開黃菊

和吳海木南湖長歌

我昔停橈鶯脰湖湖色山光眼底無嘉禾南湖再登
覽名與西湖孰勝乎初到西湖四顧喜欲尋南渡宮

墻址宋都已沒玉津荒惟餘鷺立空江水白蘇而後
繼者誰柳堤花塢伐無遺春風三月春堤禿恰恰黃
鸝不住悲一從閩海孫恩擾伎館倡條跡頓掃松杉
無恙冷泉亭但有飛來一峯好遊人畫舫戀湖中夕
陽不與六橋通命酒湖心一繫纜無數歸橈落日紅
攢峯逼出芙蓉帳尺水分作鼉鼉宮岳墳樹近于忠
肅孤山祠接陸宣公韜光宿願約朝興簪笠孤筇試
一登裊裊名泉來碧嶂三三樵唱出青藤樓觀滄海
斜陽滅水落金蓮路千折挑燈入夜數湖山輪指絮
絮爲君說北郭買舟方醉眠嘉禾城南最可憐虹橋
覆畫雲遮寺烟樹浮村綠漲天下榻飛舟恣遠眺范

蠡湖邊携二妙看竹開扉客共行聽松菴茗僧來召
明日聞鷄相蹴起暫置芳罇與綠綺簾捲長街乞巧
樓舟穿近陌魚蝦市翠盤團繡剝鷄頭丹棹雙飛流
燕尾樓榭雖殘烟雨明湖光正好鴛鴦戲雲物潤蒸
雲夢澤穀紋變現岳陽記裴休故宅竹如雲報午鐘
聲隔岸聞窅堵波上天門近祇樹園中世界分誰家
別墅露孤洲望裏雲蘿灌木稠已傾歌館猶巢鶴徐
牽綵鷁不驚鷗嗚呼名園亦荒詞樓圯阿育王塔猶
孤峙同遊長嘆復高歌武林吳子與許子流光轉瞬
日已晡水早來田亦蕪田廬增稅佐軍興下及蠻
烟與市沽吾輩逍遙還命酒醉眼看湖湖似斗較量

鷺脰與西湖洪厓爲師浮丘友好乞步兵爲酒監狂
來免解驪驪換筆床茶灶此湖中不知晉魏何云漢
君不見少伯一棹五湖邊西施風雨共年年養魚種
竹鷗夷子誰識陶朱與計然歸憶穿針兒女席好記
作歌是七夕

和海木舞蛟石歌

踏秋訪客春波門沈子邀看舞蛟石其石嵌空逼霄
漢老藤怒踞張赤帟舞蛟鏡字大於升云是鷗波之
遺迹嘉禾百里曠無山此石五丁或遙擲傳經艮嶽
黃帕封麗譙門啓不容尺以此流落尙人間花石綱
使難爲役同行吳子發長歌摩娑千言不能釋我爲

作歌答吳子世間萬事如薪積伯鸞儻屋臯伯通孝
然土莖廬無蓆人生棄擲亦偶然拭君清淚毋深惜
與子且復嘯湖山人能着幾兩屐

題袁子緒所寄畫竹卷

袁生寄我一卷竹無人無樹無村屋萬竿鳳尾上青
霄淙淙流水鳴空谷卷後淋漓題者誰昆陵先生莊
太僕憶客毘陵十載前董生與我相周旋有泉園內
紅亭子窻前簷際紛琅玕我歸般陽種竹急五月長
林騰蔭室暑失流泉冬打霜來歲龍孫無一失年年
志壑雲梢放陽丘駢邑鬱相望焦馬二園直到江南此竹
無詞人載酒詢無恙今年習靜臥溪村老樹橫空風

撼門高塘夜閉松篁隔手持此卷度晨昏我友苦索
此卷去流鶯未囀楊無絮不言此卷屬何人使我旁
皇失尋處

題王秋史二十四泉草堂圖

白雪樓傾北渚荒問山亭子烟蒼茫何人二十四泉
上氈毯高柳讀書堂泉上詞人號秋史攫然把卷爲
余起此圃舊屬殷文莊十年築屋來還此濟南名士
去悠悠卜隣邊藁亦風流帶經松下鋤黃獨灌藥堦
前洗厠踰圃前活活青溪走圃內石磨無恙否時時
學士阮亭一巾車徃徃中丞繪霞爲載酒王子翻然來志
壑校書夜火青藜閣來日平陵雪正繁歸時金杏花

初落歸去明湖紅樹村廣川依舊不窺園稍待秋堂
丹桂發旗亭畫壁又開樽

水石髮見過以長畫幅投贈答以短歌

水子貽我畫一紙揭之四壁空山裏蒼涼老樹野溪
長對面突兀峯巒起更展一幅持相詫依舊無人
村舍房樞虧蔽萬岩中不知何代何王不君畫君詩
學孟津尺山尺樹剝龍鱗曾持一卷高司寇極口稱
君謝茂秦君祖曾築大梁城君祖親見安期生祇今
策蹇寒山道父子芒鞋蹶躄行寒山策蹇來相訪蒙
頭雪花大如掌有酒不醉踏雪歸持將詩畫誰矜賞

送衛爾錫方伯擢京兆北上

方伯蹇惟將欲行濟南父老唱歌聲前詢父老歌何
許龐眉高杖爲余語指囿前年飯餓夫至今餘粟還
春杵窮冬每散百千袴雪裏陽春聲滿路葵子瑩田
病予醫幾樹青棠寧足數路傍句履盡圓冠又說如
公師道難談經奪席三千客較莠登壇五夜餐紛紛
巷陌黃金榜列祀諸祠新舛饗共姜作賦一題門茅
容對食相矜賞我聞此語重嘆息回語父老知其一
天子南巡念汝曹分陝特爲山東出大臣作計重蒼生
否則橫襟傳士子薇垣日日對 天顏誰復寧知筮
庫耳於今銅虎清三輔朱幡曲蓋鶯花暮如公那得
忘驪歌金甌箸下還東顧送公北去我東歸携得金

荃示鈞磯漫道卷衣天路遠曾經棹楔傲柴扉

阮亭選志壑堂詩卷之三

五言律

淄川 唐夢賚

寄懷郝復陽侍御八首

賈傅昔垂淚。鬼方今不庭。雄藩初跋扈。主爵正調停。
已戰秦關勝。休辭鐵嶺行。巴山剪燭話。歸夜與誰聽。
愁絕盧龍塞。烏號不可攀。檻車辭帝闕。冰窖識天
顏。有道金鷄赦。無家遼鶴還。敢同班定遠。生入玉門
關。

塞雪渾如掌。春風拂凍枝。豈緣楊得意。自有魏無知。
謂環極宣室臨軒日。淮南出陣時。鄴侯勞轉餉。決勝

在龍坪

重集栖烏府。酬恩事若何。唐城溪與衍。雪浪石嵯峨。
論蜀懷司馬。屯邊憶伏波。臯魚無限恨。掃墓一悲歌。
射虎南山下。曾同管幼安。兒前指泰岱。吉津先生自叙有此事
酒後說邯鄲。皂帽君門遠。星軺蜀道難。桑乾回首望。
莫負惠文冠。

梵志非前日。離群不記年。性從黃蘗悟。謂剎師道得紫
陽傳。瓊海文偏勝。夔門賦更妍。一樽酒不易。惠我人

關篇

侯霸癡猶故。公何似舊時。山窻容傲睨。林屋把深卮。
浮世驚還在。行年過始知。幾從驢背上。細與說新詩。

武惠臨城病賢於十萬兵。蕩平關廟筭疆域。繫民生

轉對輪何日。旬宣誥已行。郝隆知大畧。章奏滿樵耕。

阮亭曰八首感激
頭挫語關飛動

蹉跎

五十年訪事。蹉跎道力微。酒闌傷醉惡。棋罷悔爭非。
茅屋黃花岸。清泉白石扉。鯨鐘今夢破。烏背夕陽飛。

仰天寺

結遊山塢宿。問路出林端。嵐氣留晴碧。民風曬柿乾。
清泉當戶瀉。石磴入雲盤。木杪真愁絕。高潭回望難。

念東先生遊愚公谷。余以事不果行。有寄九首。
昌國城東路。棲遲久不過。雨餘泉定出。樹蔭鳥當歌。

賭酒飛觥勝分枰妙筭多登樓誰與共詩壁舊如何
曉起晨光內吟鞭旅思閒路分金嶺驛城對卧牛山
放雀呼籠至留童買藥還好從人散後來聽水潺湲
愚谷山如昨旗亭獵獵張輕風青布蓋細雨紫羅韉
王蠋家何在劉伶墓久荒山北一丘人呼為劉伶墓止愁聞暮笛

灑淚弔山陽謂謝啓東

到巔真廣大小苦為塵紛陌上嘶驕馬墻邊卧醉人
林陰歸晚市廟址坐斜熏若下東山飲應逢謝右軍

謂言公也

向不渡乾時陳風一過之綠荷浮似鏡青杏繫如棋
雀鼠聲無怨荏苒獄不疑此行豈寂寞康節好吟詩

畫城三畝宅聊可着羊裘何處濃陰合兼之曲澗幽
水春蘆荻岸山翠夕陽舟焉得來陶謝從公賦遠遊

阮亭日借高季迪

彰河衣帶水清不羨齊淵文仲臺前樹臧臺在邑城北夷吾

礪下泉前王國浩蕩先哲宿留連直掛蒲帆去湖雲
唱采蓮

冰雹渾無賴左車謀大奇狂來少女樹威起大風祠
恐負看花約頻詢歸騎遲東隣為報道紅藥已離披
已遣奚童去旋同銀鹿回相逢無別字俱道約啣杯
花事東隣好人從北海來數枝頰折贈芍藥定新開

讀史有感

古今全璧少毀譽總難憑抗疏丁柔立陳書杜少陵
贊皇真有黨次律果無能卻惟前人錯啼噓每不勝
青史升沉事挑燈一笑生思之嘗爛熟衰至則驕盈
抱犢山中老負瓢陸上行雙柑酒又綠何似聽流鶯

隣虛閣贈大淵和尚

佛閣臨峯泐蕭然倚太虛維摩此丈室大覺亦樓居
見相初非相認渠不是渠用洞山偈可知螺髻上何處量
吾虛

和趙伸符

志壑隣山路招尋不厭多案方陳二雅堂欲署三過
燈燼庭花笑林深暮雀歌蒼頭空掃逕聊自飲無何

哭安復且少叅七首

我來君亦去丘壑與江湖山下懷梁月江邊憶酒壚
輕舸愁蕙苒纖指採蘼蕪間澗猶如此何當嘆永徂
布帆南下日一枝海雲寒鍵戶兒曹苦高堂菽水安
此風殊不惡相見劇爲歡何與人間事貧僻徒在難
山窻得意草一字亦西秦濟岳頭先白江淹夢已湮
大歸應作記小悔未修真慧業終將破儒冠須悞身
信道浮生幻宜如海市叅似應三島外好結五蓮菴
蝴蝶身難寤邯鄲夢易酣情知深夜語不記老生談
日觀扶桑路浮雲千里鄉廿年鷄黍約三過午橋莊
公自江右歸余問訊海上已再會葬太夫人今哭公墓下自古誰爲壽同君盡此

賜范張聊復爾生死一升堂

羊角哀先逝寧無戶外悲
藹諸孤若此後死責爲誰
鄭重青門道裴回綠野時
勿論通德里大小總能辭
麻衣憔悴後久已毀吟囊
亦祇無繁思寧綠廢樂章
胡然聞玉笛悄爾痛山陽
始識琴張意當歌哭正長

青州道上和念東先生贈吉津先生韵

敢云隨二老五十已稱翁
鞍馬林泉外晨昏笑語同
閒行幽興發高咏旅愁空
俯仰牛山下茫茫問大風

謁范少伯祠二首

他年猶廟貌寧是五湖心
保楯棲遲苦賜夷感慨深
將軍還白馬少伯豈黃金
敢與西施載傳訛却至今

賜劍終何濟蕭然去有餘
常懷松竹逕總是藕花居
良友竒如故諸郎智已踈
東門雙眼在何似老佃漁

阮亭日二首老
筆似陳后山

冷仙祠次海木韵

畧識龜著意行藏豈問仙
好從新羽葆猶見舊宮懸
畫壁方真絕如瓶守獨堅
此時嘉遁處應在鬱羅天

再過慧山鄒秦二園同海木用汪蛟門韻

買棹指前峯溪流澗松抱
來山影碧釀出石泉濃
率爾傳觴緩陶然隱几慵
江南無此味春水綻溶溶
畧識園丁意端明豈愛錢
溪山猶閉閣疏鑿待歸田
堂古留嘉樹門深决響泉
南垣孫子好位置莫徒然

鄒園門外泉可以作池
張南垣後人猶善為山

一杖穿岩壑人間讓此閒危梁通竹塢瀑水咽松關
不止成三逕原無第二山茶經須再注抱甕與人還
錫山眺望處扶杖意低徊天際浮屠出雲根蘭若開
躡空盤碧漢證道揖黃梅蠟屐平生事探竒第幾回
余三過慧泉
未一至錫山

阮亭選志壑堂詩卷之三

五言排律

淄川 唐夢賚

和海水登東塔

春波門外路塔影蘸晴湖白石橫橋偃黃金初地敷
巍峩開古殿崒嶽擅名區連袂來徐庾浮踪雜釣屠
躡高盤磴險望遠曲闌紆天目山分越淞江水入吳
翠恩乾鵲喜舟楫老漁俱阡陌人難辨星辰帝可呼
秋林田舍黯夕照亂雲鋪雨暗荒荒渚風生獵獵蒲
百年一蠟屐異代此浮圖蓮社猶存否虎谿如故無
楚書藏閣峻漢守瘞墳孤鈴寂簷棲鵠碑留樹集烏

暇當臨水坐倦且倩人扶微醉稱詩伯行吟亦酒徒
逍遙九節杖蘊藉五經厨子勇先登矣吾衰寧免夫
遊心方浩漑古道未榛蕪回首餘情在重來問大愚

贈姚注若國博

往歲黃金市今秋采石亭新歡愁更別舊恨叙難聽
不輟臯魚泣空留尹喜經傳文誰結集遺事念書銘
何意白門棹相逢紅蓼汀樓遲千日醉笑傲五侯鯖
謝眺詩三復屈原酒獨醒虎丘重度曲鷓首暫揚舲
築室慚端木遙憐宿草青

阮亭選志壑堂詩卷之四

七言律

淄川 唐夢賚

登岱同祖珍禪師

落水蕭森出虎谿諸方喔喔聽荒鷄籃輿迥出雲霄
上拄杖平臨滄海西野濶玉牲尊五嶽天高風物擁
三齊此行惜負櫻桃節紅樹芳厓烏亂啼
望裏天孫幾度過百年杖履一高歌龜蒙山湧朝三
觀萊柞泉飛灌九河金簡舊函埋蔓草翠華新路補
雲蘿茂陵見說初成賦望幸東來事若何
青帝巍峩有舊祠碧霞宮館颯靈旗經春簫鼓寒山

動向晚旌幢落日低守道講臺雲漠漠少匡書院草
離離天門極目多惆悵濁酒徘徊欲暮時
三生支許約同登瓢笠雖開尚讓僧削壁有松皆偃
蹇危峯何石不峻嶒携來自嶽無雙士親到銀宮第
幾層絕頂方知塵世遠一龕暢好伴南能

黃華洞題壁

何方幽磬出烟蘿下界鳴泉古木多已上罡風穿碧
落更臨星斗閣銀河麻姑不爲方平集童女應從徐
福過指爪未能尋葬地先留醉墨占巖阿

宿普照蘭若贈死菴

死菴暢好居蒿里不唱人間薤露歌青社無如東嶽

好白雲何似北山多新知看竹迷蕭寺舊約聽泉過
薜蘿此地由來苛政猛燒猪漉酒漫婆娑

泛錦秋湖

十載雲湖繫客思秋風短棹尙嫌遲東山小草終何
濟西塞桃花定幾時種樹擬遮紅蓼岸買歌新製竹
枝詞名香清磬無餘事高枕蘭橈信所之

垂老林泉計始成誰能塵市了餘生將營山水爲三
窟須護丹砂當五城廬嶽爭如長白遠瀟湘何似錦
秋清卜居應號黃冠子拚與乾坤一葉輕

將弔王西樵吏部卽泛舟湖上小憇陽春館中

聞劉嶧巖家梨園吹笛

時嶧巖亦歿

漁舟歌發蓼花時策策西風掠鬢絲跨鶴不聞高士
駕炙鷄動與故人辭門開白嶽如懸畫案拍紅牙且
罷詩對此莞然還一唱諸公誰復起題詞

湖上紅衣搖落時扁舟偶爾憶尊絲等閒綠鏡窺人
老多少朱顏與世辭南國銷香聊命酒西山潑翠正
催詩歌兒莫漫吹長笛入慢分明是楚詞

念東先生招飲官壩泛舟時呂奉陽使至三首
揮手浮雲號笠翁扁舟移在萬山中風物自經先輩
異溪光每與後生同路窮林屋橫前浦水轉峯陰落
近叢何處正來雙羽士小槎疑泛斗牛宮
萬事今休問釣翁生涯樵唱櫓聲中嘗懷彭蠡石鐘

好畧與秦淮古渡同波皺白鷗雙落落溪清紅蓼一
叢叢深林隱見何人屋可是吳宮是楚宮

朱顏彈指一衰翁回首晨鷄暮鼓中世味似逢山客
換道心但許酒人同關情歲尾蛇臨壑問傷堂頭鳥
入叢且喜純陽新有約猶煩料理梵王宮

小築傍王肩望先生故居

僻巷曾隣贅世翁傳聞只在野花中數遷齋室疑難
定新築蠡廬制欲同小闢方塘六七尺旋栽修竹兩
三叢爐香清磬闌干外笑似黃冠斗姥宮

阮亭日章法好所
謂清空一氣如話

邑志成有感

從來四十已稱翁短鬚蕭騷綠鏡中舊友淒涼猶我在
古人檢點與誰同驚心白骨宜高卧過眼黃花耐
晚叢碧海石龕留舊室微名何必祀費宮

浩歌中夜廢晨餐入世何如出世難萬事祇今惟瓦
注百年何物讓金丹伯淳見獵心猶在迦葉聞琴舞
又歡試看鶴歸華表後秋風秋草逼人寒

阮亭日見道之
語痛快淋漓

候仙園銷夏

習靜閒園入夏時長林支枕正相宜酒因試藥開封
早棋爲侵邊落子遲肘後禁方傳海藏囊中丹訣授
仙師園下雨歇欣然報水漲南溪已滿陂

格物儒家見每避光明寂照那能私風前蟬奏同心
調雨後蛙鳴得意詩白鳥橫空烟樹裏青山撲翠夕
陽時行歌洛水當年事造化囉囉問小兒
直下無私亦大奇入門端以信爲師鏡臺勤拭時何
盡窳白掀翻事已遲豈是不真原未死浪云曾悟早
成迷等閒勘破偷心在白骨青山漫自疑

范文正公書堂和祖珍禪師韻二首

故園十載願多違丘壑當歸只不歸備雨枝添青箬
笠凌風囊括綠荷衣化爲蝴蝶身猶累誤入邯鄲夢
亦非放屐千峯雙眼豁新晴何岫不巍巍

麋鹿逢迎禮法踈尋幽孤往罷躊躕柴桑村裏來同

社彌勒龕中賦卜居密樹丹厓深障暑鳴泉屋角遠
通厨白雲飛去山光翠瀑布開看挂雨餘

書堂留別

朝辭流水下遙岑回首烟蘿路已深削壁巍如高士
立寒潭清見道人心到來一示青蓮偈歸去聊爲自
社吟欲逐法幢宣妙諦菊花兩鬢與誰簪

黃花山寺

閒來白嶽足幽尋路入黃花寺更深灌木章章圍綠
圃石泉灑灑破烟林野餐麥飯僧能具客坐椰冠懶
不簪稍待祇園金埒地携琴一聽水龍吟

偶興

興來萬里便巾車蛾繭嶽經詎有涯三竺鐵鞋催暮
鼓六朝蘭棹聽寒鴉閒身翻喜徵輪早鄉事微嫌絮
酒奢高唱驪歌堪一笑鶴亭迢遞爲梅花

載酒堂卽事

柳塘經過鳥先知枕簟頻隨去每遲嵐氣曉侵費嶺
出夕陽樹壓女牆低草堂近郭宜呼酒水國深林待
奕棋常造鹿門無主客花開更不費招攜

祈雨茶話

荷笠先傳樵客知蝸居如甕出休遲城陰黃鳥穿林
早驢背青帘過市低偶爾清齋堪喫雨無端高詠憶
圍棋只愁十日滂霖苦雙螭朋尊欲自攜

阮亭日好句
可書團扇

臘日宿山村將過友人不果

荒鷄三唱日高眠，負郭人家好時田。
納稅勞如精衛，海會喪勤似善財。
禪詩教胥史文無害，酒恐賓朋數不鮮。
驟雨殘冬風景異，燒燈轉轂又新年。

與念東先生宿村墅

畏天克己是吾師，王翰東隣舊鳳池。
細草如茵携杖日，棠花有識鎖園時。
鼎鐘不願頰沾酒，蜀洛無關偶奕棋。
曳履歸來松徑晚，五更擁被卧吟詩。

感興

高明且住淚如河，浪靜風平看釣蓑。
奕罷只愁鬢鬢

改哭殘盡覺髑髏多，終聞漢寢流金盃。
豈有平泉守舊柯，一自杞人愁欲絕。
不周山更鬱嵯峨。

阮亭日得
義山之神

驢駝轎二首

少年裘帶喜揚揚，巨浪長風未可量。
一自少游乘下澤，不教伯樂顧飛黃。
雲帆烏榜愁江國，珠服人車憶夏王。
如此卧遊良不惡，杖藜緩步更相羊。
塵尾輟車別有緣，高軒裁舸總徒然。
人雖四壁圖書在，法但三章枕簟全。
垂下風簾行繭室，拋殘烟棹曠梭船。
驢肩一樣吟鞭苦，如煞山谿跂足眠。

丙辰端陽後二日喜雨二首

播種誰聞天亦知請看靈雨麥秋時麥雖爛賤猶宜
麩雨後清涼正可棋伯仲竹梢催過檻參差荷葉報
平池漫愁粟死難完稅種豆山村事未遲
十日芙蓉計必開或應載酒有人來超宗笋更生麟
子得道花能結聖胎雨尙披簑臨小逕晴當賭奕上
高臺端陽已見花多葉珍重蓮池及早栽

季夏雜吟五首

九重盱食此何時罷酒閒人尙奕棋藝黍田家終歲
樂種桃道士隔年癡琴中迦葉消前業日下吳蒙竄
舊詩掩卷楞嚴穿小逕豆花紅紫上疎籬
雨餘暑過廢晨興布幔絺衣獨曲肱添稅傾家慚卜

式懸錢計日愧何曾飲醇近婦毫無味譚劍遊仙百
不能案上蠹魚梁上燕勿煩剪髮已如僧

蘸筆清池洗硯田笑辭磨蝎已無絲桐陰棲鳳三珠
樹蕉葉回鸞十錦箋文任虞卿貧更拙書非草聖老
能顛皮毛脫落微聞道不向巖平更問天

竹陰雨後長莓苔長夏松關亦快哉青史可憐西向
笑黃金難買北風來勞人無望神仙窟褐父生辭旨
酒杯萬寶告成吾事足休嗔租吏打門催

阮亭日亦
典亦雋

月明鐘鼓報更殘雨霽蓬窻起夜寒蚊效虫尤風破
陣樹開蘭若鳥安單天街初轉跡跌坐銀渚頰移伏

枕看濁世未能拔宅去浩然香露誦荷蘭

六日雨

齋罷濃雲壓午天銀河更欲散鳴泉客來作黍停車
轍與到觀濤躍馬鞭綠逕苔催鋪地錦紅籬風發轉
枝蓮長竿犢鼻晴陽後聊免人嘲邊孝先

月來

負手高臺玩列星月來林影下空庭髮如老鶴翎先
白山似紋螺髻獨青了不異人出世法未能免俗衛
生經形神俱妙渾閒話幾見紅塵過百齡

過念東先生東池荷花開有百枝視小齋盆沼

渺如矣有賦

布蓋青騾漫出遊幾時不過百花洲三千翠黛臨歌
浦十二朱簾捲畫樓別苑祇堪紅勒帛小巫莫唱錦
纏頭采菱舟說江湖濶笑夜郎王氣已收

傅家灣上將爲菟裘老焉

感嘆吾生本有涯誰能築塢便爲家亭堂濶不容千
馬酌酒寒難醉九霞上塚哀猿三峽淚守園棠棣五
侯花何人葬我林泉好莫信青烏龍虎砂

阮亭曰非南華非楞嚴非蒿里非
薤露筆端拉雜讀之歌哭不得

浴

安得清流過此生菰亭綠樹小船橫祇將沐浴銷朱
夏惟有酣眠當赤城坐見蓮池三婦艷忽聞蚊陣一

軍驚明年結屋償痴願定與閒鷗軟血盟

再疊前曾字韵

鯨鐘驚夢攬衣興世路誰堪再折肱大澤誤還憐父
老平泉痴不囑孫曾樽傾北海吾何與老補東隅病
未能鐵鑄九州真一錯毘尼穩付在家僧

雨

急雨連朝百慮清虛廊屐齒試經行寒窻竹亞檀欒
影僻巷門無剝啄聲暑似鷄竿初放赦人同鳩婦欲
呼晴却嫌芳草閒情思一夜池塘太怒生

阮亭日結
句神到

贈王東亭進士

已輕圭組更何思長夏初逢雨霽時較竹分衿圓幾
寸賞花細數放多枝輪租以外無難事學道于今重
鍊師好祝吟鞭休徑去但承杖屨是良期

同東亭至念東先生荷池上再用前韻

浮名爛熟百回思莫負花明酒醖時茆屋枕宜支北
牖薰風荷正發南枝仲初詞賦推詩伯謝傳蕭閒號
奕師惟有酣眠陳處士上清奉詔亦期期

愁思

放懷未穩更愁思最是糧添穀賤時精衛原癡寧避
海鷓鷯奈小慮無枝牢盆失計傷鹽策砂汞何緣得
導師歲歲田租欣早畢來春多恐悞徵期

爲弟京武置一莊私計買牛積穀而後歸之從

去秋納糧種麥添牛未損及莊中絲粒而穀

日賤賦日增矣繕冊付弟詩以志之

買莊曾記小山成種麥輪租與汝輕半載持籌爲鬼

笑一生執拗與天爭經秋空許添黃犢廢圃猶開走

赤黠君物早還君自主不妨挂角更春耕時余小山初成卽以

莊山名之

遊心

鷹隼高飛動客思倏絲不敵曉寒時蓮衣搖落懷菰

米香板缺殘憶荔枝范蠡才堪司酤市邵平命合老

園師久閒蠟屐遊心起禁旅新傳奏凱期

念東先生東池見招有作

疏傳歸來酒政寬黃金日日買清歡平泉不作兒孫

計世界原如缺陷看固有鏡湖歸賀監曾聞微雨過

蘇端敢云二老同時晚來往風流後正難

阮亭日聲情俱妙

觀禾

牛蓑浩唱晚雲橫漸學觀心事事輕已覺胃衰妨飲

酒尙因餉急費謀生縞巾婦向松風飯翠岫人連細

雨耕可笑殘書還挂角荆川老去浪談兵

阮亭曰美言可市

水紅花

開窓除草太劬勞
蘭芷猶懷賦楚騷
雨後池塘增浩蕩
客來松屨沒蓬蒿
聽松預祝千年壽
對菊惟添九日豪
何似水紅花爛熳
一秋勢與竹爭高

七夕至望無日不雨

積雨連朝損稼禾
夜闌茆屋泄清波
人間畫棟看生萬
江上樓船定洗戈
幾處乾封瞻白帝
數時決口塞黃河
天闡仁愛真難問
好祝鳩子細歌

時關中大旱黃河口

贈韓有聲

杖屨相從十載餘
扣門此日宿村居
古今已讓陶彭澤
勝敗休論李左車
五柳重栽綠砌菊
百城獨擁滿

床書年來閩海猶多事
抱膝閒吟閉草廬

種樹

十年知命悟窮通
悔不逃名種樹翁
阿壽池真君子國
有巢氏乃大王風
千頭橘柚圍新塋
十畝芙蓉守舊豐
腰斧灌園林下事
枳黃棠白野椒紅

輓韓崇安有聲

菊日桃亭兩置酒

崇安踪跡暫歸家
感嘆浮生信有涯
幾日盤桓籬下酒
數時離別雨前茶
新亭不作長生殿
桃樹真爲短命花
此去雙鳧何處好
仙山香火武夷槎

阮亭日却似中郎佳處

買驢駝轎

竹甕穀賤費行糧，欵段誰能老此鄉。塞上健兒偏走馬，江間漁父但鳴榔。雙輪車碍聽泉路，五兩鞋穿說法堂。惟有卧輿眠最穩，驢肩來往挂奚囊。

阮亭日入手便成妙諦似麻姑粒丹砂也

過晉石兄幔坡小飲

高厓密樹覆長河，幽事山人不在多。幾載香林爭結果，一時綠逕盡垂蘿。匡牀置枕朝山卧，石几題詩挂笠歌。况有青帘遮去路，逢君不飲更如何。

秋

時序關心景物遷，空齋雨歇更蕭然。流螢明滅踈桐外，促織淒清洞閣邊。紈扇委難留故物，桃笙本意碍

高眠世間百事同，流轉夏葛冬裘付與天。

艾長人司寇先生挽詩三首丙辰七夕前二日殁

生平慣賦墓門詩，觸熱多緣無好辭。舊是故人宜痛哭，身為逐客尚沾頤。白榆墮地天難問，烏鵲迎神世不知。莫信仙人多妄語，橋邊賺煞帝王師。十年煨芋事如何，畢竟名山志易訛。黃閣掉頭終寂寞，青鞋撒手太蹉跎。歐陽鞞獄心如在，伯道憑天恨獨多。政府別來無隻字，臨風聞笛一悲歌。

阮亭日領聯真棒喝矣

乾坤逆旅漫悲傷，直作遊仙去不妨。歲在辰龍呼起，起死如擒虎。亦堂堂孔融尚有平原相，黃憲宜臨太

尉喪。屈指鳳池前輩少。可能披髮下山陽。

苗家窩至郝家莊諸泉二首

雨餘度壑聽潺湲。一夏山城近掩關。澗樹經秋浮岸
長。鳴泉山谷灌畦還。匡廬三疊石坪下。明聖諸峯天
竺閒。久矣菟裘占此地。便來銷夏亦銀灣。

溪林蓊鬱大林開。特爲聽泉騎馬來。瀑布移時停杖
屨。石龕隨意卧莓苔。書生意氣逢多慨。漁父聰明見
每猜。須信山人幽興發。偶然去住擬丹臺。

感賦

皮毛脫落見吾真。快意從來屬禍因。誰道元城推鐵
漢。祇宜敬叔祀金人。巉巖卻得康莊路。冰雪翻爲浩

蕩春阮籍無端窮。便哭一生坎壈荷天仁。

讀史有感

茫茫世事鐵山圍。紫闥清泉計孰非。殿上笑談關性
命。樽前媚嫵怨宮闈。天寒旅雁飛常急。漏盡蓮燈浩
不歸。興發還思牽獵犬。幾回肯老釣魚磯。

曉起二首

年去愁非笑亦非。悠悠持此欲安歸。老思霞舉惟仙
授。壯志澄清與世違。伏櫪馬嘶青陌懶。下韉鷹倦赤
霄飛。人間剩有長春訣。忍負清泉白石磯。

田家老屋結烟蘿。坐便啣盃行便歌。樵父逢人無冷
煖。瓦盆釀酒似淮河。金階罷相知交少。油幕從軍感

性多借問紅塵車馬客回看巖穴較如何

小臺築屋念東先生額曰洞閣和張歷友

豹舄鎮日不開關高閣危欄與共攀雅樂奏宜臨夾
谷酒杯寬可對費山麥當播種千倉罄農入秋成百
務閒憂樂無聞長白近憑將藿粥駐朱顏

觀奕時鄉隣有闔者

由來知足近神仙剝啄何緣破晝眠蝸角蠻爭聲動
地蟻封虎鬪血滔天樹陰不厭韓持國聊矢頰煩魯
仲連除卻休心無別法逢人一味老婆禪

訪先輩習靜山中

人間歌笑日紛紛到處山分一笠雲爭怪蟬菊開後

閣生憐將相起高墳鼎中藥熟身長泰物外仙多世
不聞笙鶴倘臨休徑別我來瓢衲欲隨君

山王莊道中和念東先生時重陽前一日三首

野廟秋風鎮水涯前車又復過山家驚看岸斷真千
尺不信詩成便八叉磴道轉時山與衍泉流深處水
橫斜祇宜拄杖從容去處處開樽對菊花

青山疊疊水湯湯僑寓山家醉不妨自是采真逢阮
肇却因垂釣識巖光無煩主婦雙尊酒但借隣翁四
腳床曉坐九霄雲霧盡可知天意爲重陽

暫放蒲團卧水涯欲投宿處問人家千巖瀑布琴三
疊百衲雲山畫一叉茆舍不驚漁父過吟鞭細數雁

行斜預愁明日芳樽晚此夕先簪兩鬢花

途中聞孫樹百給諫至

十年作賦憶長楊瑣闥新街出建章殿上論時追董
賈囊中啓事問豺狼吟鞭落照孤鴻外市酒晴雲古
驛傍回首江鄉青雀舫故園明日恰重陽

秋行偶興

閒蓑莫遣素心違豈易清時靜掩扉禽尚偏無婚嫁
累杜陵全借諫章歸謀生拙任塵緣薄避世堅因學
力微白石潭深紅蓼老呼童淨掃釣魚磯

重陽後韓燕翼大叅邀遊回路峪四首

山深樵牧放歌喧細菊垂崖香正繁秋日蕭閒宜杖

履故人清興在琴樽稚川福地仙皆集文正名泉道

自尊短策西風時矢笑遊仙忙似謁金門山為范文正公讀書

處道書七十二福地之一

久於副嶽失寒暄到此依然霜樹繁彌勒昔時容卧

榻柴桑經夏廢清樽罡風直逼黃花老妙藥難逢白

兔尊蕭寺崔嵬須再到禪牀着句賭山門余類年在山習靜寺

僧戒律至嚴

錦秋長白兩奇觀對此襟懷每悵然錦水有舟皆舸

艫白山無地着吟鞭已知別壘藏丘壑定有幽人製

畫船明歲結菰來副嶽棹歌齊去採紅蓮

阮亭曰一氣迴折老筆紛披

醴泉畢竟藉明裡寄語僧庵切莫喚入手池塘三峽
遠開門霜樹一堂春黃花寺古晴雲暖綠柳巷深樵
舍隣更上摩訶孤頂住經行曠望豁禪人

登摩訶東峯

單椒久坐不聞笙依舊從容策杖行細草眠餘留兔
窟懸崖墮處起雷鳴長蘇典發先賓客時念東先生
賈勇先登
古栗年深見弟兄山中有張華東先
生古栗老友石碣此後登臨添故
事輓轡奇計絕陰平

回路峪留別韓燕翼鮑夏生諸公

秋亭回望綠雲圍紅樹驚看一葉飛得句嘗愁樵牧
走射生且放兔狐肥車中黛色行還住枕上泉聲夢

不違留語諸公當奕戰斧柯未爛慎無歸

小春掃先墓見有携祭具醉卧道傍者二首

處處青山哭白楊人間啼笑揔茫茫愁來霜露清齋
減話到興亡痛飲長前歲鶯兒遷別樹舊家燕子換
空梁九泉一滴真難問祭畢何妨醉道旁

阮亭日惟
喚奈何

黃葉西風野哭喧紛紛祭榼過山村兒童膜拜承荒
草婦女焚香掃墓門碑版麗牲霜後淚紙錢延燒暮
來昏茫茫天地渾如此感嘆歸來盡一樽

窮泰嶽以北諸山

巾車日日賦閑遊縮地乾坤小十洲竹杖高懸新蠟

屐鷄聲起舞舊羊裘橫穿嶽背無全險細踏萊泉失
剩流縱未倚帆星宿海鵬風差不負清秋

阮亭日如諱南華第一篇也

巖下山莊和念東先生三首

桃花流水杳難逢誰信仙源在此中種竹千竿名士
意栽桑百樹古人風題詩不到催租吏入定休愁報
曉鐘好借一丸封斷谷結廬常住兩三峯
清泉悔別恨如何畢竟誅茆得計多是岫巖巖皆列
闕無溪澌澌不鳴珂谷深露下猶黃葉山暖春前已
綠波水自有情迎送客南流豈盡爲漕河
尚平五嶽着先鞭有美西南選勝綠棋局多時愁

世芒鞋盡日不逢仙人穿樹下從天下馬轉山前度
水前歸到茆齋清夢穩蘧蘧猶在碧雲邊

贈石震青術士

相逢此日復奚疑五十行年命可知磨蝎入宮生已
註計都何法穰能移屬平絮絮爲天問李廣囂囂怨
數奇握粟常愁唐舉笑或應蔡澤亦庸兒

龍山驛題壁

開遍荷錢謝盡花清明節後筭年華菜畦剪剪翻蝴蝶
蝶麥隴油油洗老鴉福地如齊今莫並歲星在國古
無譁太平更祝銷兵甲喜詔先傳賦不加

阮亭日三四妙

阮亭選志壑堂詩卷之五

七言律

淄川 唐夢賚

載酒堂題壁二首

不成籬落但栽花
茅屋三楹枕水涯
柳浪館中摩詰
畫虎丘亭下
慧泉茶溪山作主
來為客樵牧同遊
孰是家天地
吾廬無住着
蕭然西竺見蓮華
鎮日陰陰水滿塘
頽垣盡處接天光
樹根宜繫船三
尺崖際還添柳
幾行闌奕真成安
石壘看花不讓午
橋莊頰來卻怪般
陽路飛落金牛湖
一方

再和前韻二首

阮亭選志壑堂詩卷之五

七言律

淄川 唐夢賚

載酒堂題壁二首

不成籬落但栽花
茅屋三楹枕水涯
柳浪館中摩詰
畫虎丘亭下
慧泉茶溪山作主
來為客樵牧同遊
孰是家天地
吾廬無住着
蕭然西竺見蓮華
鎮日陰陰水滿塘
頽垣盡處接天光
樹根宜繫船三
尺崖際還添柳
幾行闌奕真成安
石壘看花不讓午
橋莊頗來卻怪般
陽路飛落金牛湖
一方

再和前韻二首

放開淨土種蓮花。穩泛鐵舟香水涯。有佛肯容陶令
飲無經曾註趙州茶。早投白社來青社。憑當漁家與
酒家。木槿從今休便種。不堪夕隕更朝華。
麴車載道炫生花。水厄閒愁未有涯。桑落香於三白
酒。松蘿苦讓六安茶。觀心白骨初爲學。埋爪青山暫
作家。六逸不知沉醉後。幾人解轉妙蓮華。

漫興再用前韻六首

秋半庭餘三兩花。金風獵獵響天涯。留冬青樹防栽
菊。服地黃湯切忌茶。一卷楞伽開士院。十分林麓野
人家。英雄自昔多痴話。豈必金吾娶麗華。

阮亭日
結妙

草深黃犢沒林塘。鑿壁初時挹末光。一自青衿來殿
閣。敢持白簡議班行。藏身梅市原名福。倚釣桐江舊
姓莊。早歲不知更事少。老年始解笑剛方。
弱冠曾看上苑花。蒹緱一劍客天涯。校書秘閣行頒
札。燕喜宮筵坐賜茶。敢學抽簪驕謝事。生憐索米夢
還家。故園十畝渾無恙。回首承明澹物華。
憶昔燕南水滿塘。翩翩樽榼醉秋光。三英館閣追前
輩。萬壽宮牆綴末行。豈謂階前諸玉樹。翻成陸氏一
荒莊。晨星搖落知誰在。慚愧猶餘唐子方。
邗溝向日弔瓊花。明月紅橋泊水涯。載酒平山堂看
竹。題詩芍藥院沾茶。巾瓶一半投僧社。寶瑟三分住

伎家誰道維揚兵燹後錦帆自古擅繁華
錦秋百頃藕花塘曾此方舟泝月光
罨畫溪山旋入詠欲斜醉墨不成行
張燈夜過扳醫社伐鼓頻驚宿鷺莊
常見水鷹船放食長竿學得捕魚方

憶舊再用前韻

寒槩彭湖打浪花石鐘湖口問津涯
雨中樟鎮千頭橋圍裏春浮百樹茶
長荻人驚聞虎處小舟夜繫飯牛家
翠岩快閣方居士回首十讀如謀平聲年感鬢華謂無

可大士與蕭孟昉園林

江南親見荔奴花種稻畦村半渚
涯玉版初參禪悅笋旗槍乍試緝
封茶綸竿擬住魚兒港盞飯常分初

子家白鷺山前真不惡何人塵土夢東華

廬山瀑布散蓮塘細雨微雲逗日光
白鹿洞開泉幾

疊黃崖風斷玉千行僧容似陣臨堂鉢
竹色如椽近

寺莊三代威儀真在是至今斗笠憶諸方
三疊泉由白鹿洞金

竹坪上卽是黃崖瀑布四十丈有太白海風吹不斷詩

漫興再用前韻九首

林下鋤禾復種花結茅巖際與湖涯
年衰莫倚陰陽酒胃濕平拋龍鳳茶
白日已沉還問世青山何在更謀家
道人早證無生恐不轉風輪轉法華

敢道人開智慧花開情倒峽本無涯
愁看竹葉純傷酒夢聽松風誤煮茶
不速寒蛩公入砌無辭社燕浪

還家斷腸草損秋棠價直作堂前萼綠華
溪邊築塢擬藏花溪外秋濤尚泊涯邀客聽泉兼看
竹乞人賭聖再留茶華門鎖鑰長逃世高閣蒲團小
出家十丈軟塵休入夢早時慚愧已清華
金烏不住怨飛花轉轂流光未有涯眼底霜嫩嘗歲
酒隔時櫻笋薦芽茶鶯兒出水還啼雨燕子回巢更
憶家弱草輕塵浮世事法王一笑墜空華
遽遽蛺蝶下探花雙羽踟躕掠水涯大似漆園人伏
枕來催紅蓼岸烹茶哥密對竹添三友老圃當門作
兩家寄語東籬呼錦翅勤翻香夢繞霜華
三生夢破笑拈花短梗何堪泛海涯世味酸京知市

酒詩才蔬笋似僧茶難陀不忝真男子羅什何緣累
室家回首浮雲無一可禪天高會憶龍華
掃跡江湖濬石塘茅簷竹樹亂燈光炙笙玉笋調鸞
語移柱銀箏促鴈行晴日翻書臨洞壑暇時釀酒過
山莊太平齒髮千年健枉與懸弧志四方
山下橫橋壓半塘山腰野菊爛秋光草蟲播鼓搖三
弄雲鴈張芝篆幾行一帶白茅巖結屋數攢黃葉樹
圍莊此間定有真仙住好扣丹臺乞効方過豹山
青錢不惜買陂塘來與隣翁負日光汲冢佚文商缺
字洛神舊刻榻殘行齒衰莫廢遊山屐裘敝原存負
郭莊莫是患貧無善策旌陽好賜點金方

遊青雲寺

年來不唱飯牛歌，曝背招提意若何。
蟬屐青山勞夢久，支頤碧樹看雲多。
爲聽梵唄留僧榻，遠探鳴泉問牧蓑。
明日不知千嶂裏，寒流幾道掛烟蘿。

有感

也知塵海三生幻，一日浮生且看花。
脫殼哀蟬寧離樹，回巢春燕更爲家。
金環自不辭羊祜，敝帽何曾戀孟嘉。
便使花開蓮世界，藕絲青莖正無涯。

九日登長白山二首

竭來蒿里物皆齊，倚瑟何如此杖藜。
桃菊誰家還棘矢，仆碑昨日又沙堤。
花開錦樹鶯聲亂，霜落寒蕪鴈

影低痛嚼忽驚前世夢，石龕海外憶丹梯。

和畢孝先

招提脫粟暫來同，有限生涯梵唄中。
牛背驚人三世笛，馬當誤客一帆風。
竹爐酒沸黃花老，藜杖斜陽青史空。
不信長連牀上看，鐘聲出定海天紅。

和趙古言

又贈徐東癡隱君

躋勝猶如年少時，漫留餘勇讓東癡。
三山風憶仙舟近，五嶽遊應旅鴈知。
霜樹章章皆菊圃，樵歌兩兩是陶詩。
禪林擬向壺公問，良日何勞坐奕棋。

貧

讀殘貨殖傳，何云四壁崢嶸。
酒半醺，磨鏡業憐居士賤。
織簾心許道人勤，鶴謀肉食羞凡鳥。
竹灌腥流污

此君寄語空生應辟穀巖花豈有粟紛紛

董玉文招飲留宿有懷繡章同年

杖藜蕭寺破苔痕握手懸如見弟昆老大逢迎添感慨
深秋簾幕共清尊舊交開徑從羊仲古道登牀訪
鹿門借向廣川夫子問年來正誼與誰論

隣園煩過

解學尊生奈老何晚餐腹得百回摩籬花畦菜秋原
靜樹杪樓頭山翠多賣飯兒郎同巷出賽神鼓吹隔
牆過避人早已如逃債路上寧逢醉尉呵

送劉鍾宛學士祭告歸里

殷禮柔神翊 帝圖侍臣啣命試雙鳧三台玉版題

丹篆六節轡文護赤符傳檄方壺移海市燔柴日觀
聽嵩呼錦衣舊識新豐道一笑黃冠乞鑑湖

西江卽事

連朝寒雨沒龍沙晴日江城閱物華橐橐長廊交屐
齒鱗鱗虛閣敞簷牙圖書新購如佳士枕簟閒欹似
故家白酒鱸魚非不醉遊人久矣念歸槎

禪寺口號

豐曇老子破袈裟傳去傳來爛若麻布衲七斤將過
歲板狀四脚漸成家安單人似投林鳥下水船如赴
壑蛇冬制不知爲夏制法華拈着當南華

阮亭日辯
才無礙

南昌送孫卧雲歸里兼訊安復旦
九仙石室題松處廬嶽諸峯得似無東武黃花猶未
晚西江白酒可曾沽路從淮海分三島人掛秋帆尙
五湖倘遇安期勞借問如何經歲少來書

寄懷張子礎同館

策杖寒原有所思廿年如夢玉堂時黃金誤世砂難
就白雪欺人鏡有絲宴坐三關荒晚課結遊五嶽負
前期何妨把臂赤松子來扣柴門共一卮

宿廬山開先寺看黃岩瀑布

五老峯前三疊泉十年誤信是開先卧龍未得窺金
竺白鹿誰能下玉川荒寺鼓鐘存晚課虛堂風雨足

宵眠五噫舊事歌原錯瀑布香爐總浪傳

無棣歸畢載積州守以朱魚見餽詩以報之向

以巢雲阿圖卷索其芭蕉因并及

小菴痴望綠雲涼豈爲貪饒損墨莊憑去裝潢添鄴
架斷成灑掃卧匡牀按圖客自餘松竹題葉僧原代
縹緗寧有秦城曾負約夜來先報贈魚秧

賀念東先生得仲孫

時清恙方起

喜報啼聲起晝眠多應索杖碧梧前安排伐鼓爲湯
餅檢黠醪金置酒錢小字定宜呼病已官名預卜伴
翁傳雙珠卻詫添奇事降日同兄但隔年

過王冰壺少宰墓

墓門遙望鬱蒼蒼磨鏡曾來薦一觴雲壓浮圖松影
綠城臨翁仲豆花黃緱山有恨吹笙別湘浦難聞怨
瑟長正則不勞頰致問玉樓筆札似人忙

鄒平道上二首

祇合籃輿入翠微蹉跎浮世尙依違不材早歲偏通
籍善病高齋正掩扉花塢管絃聽似水禪關杖屨至
如歸六州鐵鑄難云錯四十餘年事事非

阮亭日五六
不減程孟陽

尙平逸興亦良難好事群魔有百端老至巾車鴉鬢
短計成蠟屐蒯緱寒三湘綠向窻中出五嶽圖來屋
裏看乞得神仙飛杖法雲山鄴架路漫漫

送王阮亭北上

時西樵
已歿

二陸翩然昔入洛士龍今日獨登車梁園詞賦推司
馬漢相勲名重積儲粉署爐香添畫戟鈴秋落日怨
樵漁不堪握別還惆悵蔬食三年病倚廬

中秋放魚濟上

晴湖十里漾清波林麓堪憐網罟多綺席有人驕玉
膾錦鱗何計夢銀河蓼花灘上鷺香餌阿耨池邊誦
佛陀莫道釜鬻無造化請君回看壁間梭

濟上留別朱野岩

湖上紅衣搖落時閒亭竹樹寄芳卮青門射策人皆
老碧嶽尋真事已遲別岸蒹葭留晚照前溪簫管動

離思陽關入破聲聲慢知共琴樽更有期

勞山看海市補賦

望日天涯碧玉隈番轅嶺下化城開五雲縹緲芙蓉
島百雉崔嵬烟火臺人物安期應共住市廛徐福舊
同來麗譙乍捲青巒出指點諸峯首重回

山塘初成和念東先生見贈詩

山國焉能水竹全滄洲夢到亦蕭然三秋湖口烟淨
樹一葉湘雲浪拍天山就茂林遮屋角水添漁舫繫
窻前後來興廢偏能料梓澤丘壚與並傳

世間缺陷亦周全山郭渾如澤國然志壑惟容青箬
笠酒堂穩號綠雲天千層波浪飛林杪十畝芙蓉盪

席前寄到詩瓢堪勒石蘭亭或借右軍傳

擬登岱

天門一徑屐痕斜屈指同遊憶孟嘉玉女霓裳金絡
索道人漁鼓鐵琵琶霜林落葉聞清嘖松雨寒泉醉
茗花此去須成十日住蒲團香板宿山家

池荷初植七月中始見一花

銀塘花事已披離辛苦長鬚報一枝翠玉故留秋水
照紅衣却負艷陽知蟬如鳴沸高林早菊尚排當老
圃遲寄語花神須努力殷勤開過落梅時

送王汾濱西歸

一別鄉關路幾重誰云梵志有奇踪無端興與秋風

起不盡雲如歸思濃賣藥無人知舊字觀心有意看
前峯到門可向中條卧莫娶山妻懊惱儂

阮亭曰秋光多似宦情薄山色不如歸思濃三四似之結句調笑甚雅

卽事

焚香晏坐惜分陰勘破浮名罷苦吟榴摘繁花將結
子烏當晚哺早投林誰能採藥留神佩且可聞欽詔
道心未老壺山休自笑寒岩枯木亦難尋

遊仰天寺沿途遺物頗多戲作

遊裝潦倒稱人懷畧草儀同傳亦佳木盡洞中留爽
袋途長山下棄芒鞋寒潭孤館巖陰寺磔廟秋風諸
葛屋七簷已空樽俎馨先生歸去罷清齋

阮亭日有此好詩更成佳話

八月二十三日夜雨

農家痴望隴頭雲一雨蕭蕭隔夜聞荆楚傳添江上
甲伊涼看罷殿前軍晚禾無望登三圃秋麥猶堪種
十分更喜重陽消息近早開黃菊對斜曛

偶感有作

慚愧龍泉夜夜鳴人間鯨浪可憐生青山暢好詢無
恙流水何能話不平搥鼓謬思春夢破寒蟬絮與怒
塘爭漁竿清磬年來事噎病從教廢鼎烹

聞禁馬

棧豆年來耗積儲五花爭許困鹽車騰驤定可供鞭

策款段終愁欲廢除海上笠簑原牧豕山中風雪正
騎驢青牛更屬神仙物掛角悠然讀道書

阮亭曰絕妙好辭勝唐人
之短轡長鞞滿九衢矣

過東隣看芍藥四首

小巷柴門畫不開菜畦常護養青苔更無問字蒼頭
至但有啣泥紫燕來愛酒得兵如故友題詩已醉任
空杯千金欲葬名花塚柳絮狂飛亦築臺
剝啄頻詢開未開亂紅狼籍已蒼苔多情粉蝶晴能
至解事黃鸝晚不來典慶池思李暮笛玻璃酒奉太
真杯詞人去後無知己掩袂迴歌銅雀臺

阮亭曰三四少陵句
法通篇風情駘宕

芍藥十

平

分九已開遲人拄杖點蒨苔酒闌客去頻

題句花下年來數舉杯種竹無心勞客過池魚不乞
待秧來何妨與子如東老暇日西隣上小臺

維揚故事百枝開聞道名花剩碧苔林下美人誰共
語金衣公子尙遲來洛陽乍見姚黃本河朔宜傾哀
紹杯座上低垂猶有恨朝雲暮雨楚王臺

小齋偶成

負手閒堦數笋芽短垣紅紫暈朝霞謝家群從翁孫
作楊氏諸姨姊妹花鬪蟻乍雷驚破陣分蜂長日愛
排衙不知林下吟哦久俯仰詞人愧八叉

阮亭曰天
真爛熳

西隣製棺犒工奉酒

何事丁丁伐木聲。隔籬風送未分明。酒酣擊鉢詩難就。興極呼盧采不成。世上閒情銷畫閣。老來心緒寄佳城。玉棺天降還應待。濁醴牆頭奉一罍。

阮亭日題奇詩雅稱之

傅彤臣侍御和雷笏山社燕詩題扇見寄依韻

奉答六首

春風春雨共招尋。似向人間說斷金。舊日閒巢雛已占。新年太歲戶宜陰。敬瑜詩賦同林鳥。合德椒房共命禽。寄語紅襟諸侶伴。棲遲海樹尙何心。

阮亭日工于白燕矣

竹塢松關逐隊尋。何勞買賦枉千金。啣泥花落春常靜。乳子簾垂晝日陰。紫領相成占後報。烏衣夢破悟前禽。何緣一卵流傳去。遂啓商王問鼎心。舊厦凄凉一再尋。草堂原不重黃金。從來沐浴宜先祀。自解經營避太陰。入賀同堂皆喜雀。當晴化石亦靈禽。欽頭春勝懷中夢。剪剪常勞少婦心。斗酒芝山夢可尋。黃梅雨歇樹頭金。交飛鴻雁回沙浦。並坐黃鸝話社陰。零露乍歸遺玉壘。雲車初下會仙禽。劉郎已去春風老。莫動詩人感慨心。危樓盼盼鎖千尋。詩憶香山字字金。細柳池塘音上下。釀花天氣舞晴陰。縱歸海嶠仍傳舍。不繞長林伍

衆禽一自存 巢人去後茅簷盡 棟總無心

阮亭日三四工麗 不必言妙得性情

孃孃婷婷掌上尋 嫣紅一捻步搖金 高樓春色簾櫳

暮小院輕風竹樹陰 禮近慈鴉爲孝鳥 巧如鸚鵡號

文禽銀塘細雨歸來晚 門掩黃昏離別心

阮亭日六首情思纏綿蕩老杜輕燕 受風斜五字不爲少此數百言不爲多

百脉泉看荷花同念東先生四首

颯颯金風暑氣收 漁村雖近未窮遊 林巒勝地惟明

水荷菱連天似錦 秋暇日不辭筇竹杖 芳樽一上水

蘭舟行人莫唱江南好 尙存殘花對白鷗

珠泉通海亦奇哉 王屋盧傳濟水迴 菱芡經秋盤錦

繡汝潮入夜嘯雲雷 人愁朱夏同遊晚 鷺雜紅蓮並

下猜借問長橋車馬客 幾曾特爲看花來

箬帽單衫八月天 竹兜水國意蕭然 嘗憐澗壑無賓

主人約烟霞共往還 黃稻風來花外寺 青山雨歇樹

邊泉劍池孝水明湖館 百脉名當第幾傳

淪茗憑欄一嘯呼 人間驚見此泉無 琅玕雨重臨僧

舍齒苔晴開照酒爐 鳥下掠波憐翡翠 人來顧影鑑

眉鬚濟南金線羞 相似一樣清噴萬斛珠

丁巳中秋十七夜方有月夜起小飲和念東先

生三首

雨伯停鸞絳節回 諸天油幕一時開 河山留影水輪

外丹桂飄香壁月來地上歡呼珠離海世間悵望蚌
舍胎十分秋色還人在携酒招呼上小臺

夜起披衣顧影寒芭蕉滴露響琅玕桐陰籍地瑠璃
界荷葉為杯碧玉盤有客高眠真懶漫無人對酌更
清歡鷄聲再唱猶難寐拚醉從嘲日幾竿

舊詩裁罷夢初回行馬琅璫戶自開夜色蒼涼疑世
改河聲泐泐送秋來星精欲滴通仙宇金水堪嘗立
聖胎舉似旁人聊作笑人間誰信有瑤臺

飲密頭莊勸公瑜種樹二首

魚藕池塘花竹居與公位置欲何如香來半頃風兼
雨雲覆千竿密復疎元自逢人應壓倒陶朱與我亦

乘除從今不避催租吏萬石輸君本緒餘

神仙不就不封侯閉戶聊為八口謀暇日自携筇竹
杖清秋宜上採蓮舟開樽人進千鍾酒趺坐泉通百
道流欲問山翁門外事楸枰正戰且休休

阮亭選志壑堂詩卷之六

七言律

淄川 唐夢賚

丁巳重陽後將之金陵寄何第五同館

廿載鄉關悵索居聞君道氣徧樵漁吳王苑裏秋蕪
老燕子磯頭古木疎詞賦定知新律好滑稽還似舊
時無酒闌見說江山助親作磨厓斗大書

寄徐寧菴同館

少年意氣下鞞鷹梵唄而今就佛燈五嶽巾瓶歸鷁
舫六朝歌吹起漁罾回頭自笑初生犢未死倘因三
拆肱江上丹砂知熟否片帆早晚問金陵

和吉津先生過穆陵關

亂岫西風野菊斑
藍輿石磴有躋攀
不知攬勝遊方始
祇道登高客乍還
尚父鼓刀青社土
寄奴捲甲穆陵關
銷沉舊史如流電
大藥何人解駐顏

阮亭曰俯仰甚深格調尤老

白石斜陽照兩涯
穆陵關下水漣漪
秋蟲草樹爭鳴日
古驛黃花並轡時
北望營丘封自固
南流神禹力難施
重來勝地知何日
悔不清泉更奕棋

蘇村曉發

百城烟水訪南能
孤館聯吟興不勝
鬪奕多偏忘日錄
縱譚久欲廢晨興
松風丹竈隨弘景
菰米鱸魚問

季鷹何似金門同
待漏鷄聲初唱夢
呼燈

吹笙跨鶴百無能
柳檝橫挑尚可勝
不憚星裝妨日出
須携雨具看雲興
同行僕似隨陽鴈
乍客人如脫臂鷹
土銼短檠渾不寐
聞鐘展卷又挑燈

途中和吉津先生二首

雨後冰縈出沐新
曉行月闕色如銀
相逢憔悴朱顏者
總是蹉跎白髮人
橘柚誰家留玉樹
籬花多分散香塵
漫愁湖上桃堤盡
客到吳山正小春
園下昨報菊籬新
黃鶴翎兼御帶銀
抱甕不辭終歲力
上盆誰作看花人
自憐蠟屐雲山色
未免征衫陌路塵
舊架圖書初釀熟
回頭惜別故園春

阮亭曰天
真爛熳

九曲旅壁和傅彤臣侍御

天水蒼茫相與依長河南去欲安歸
鳴榔鷁首供軍食打鼓龍旗齋
御衣砥柱何堪民力盡萊蕪尚恨
石泉微不知津送隣夫策廷議誰能較瘠肥

時河使
議協濟

修河
事

聞孫柳下郡丞訃音

使回縞服已驚愁悔不遲君汗漫遊
魚素過江傳故里虎丘對酒盡名流
何緣白鶴千年怨不待黃花九
月秋丹旄便當南下好湧金門外是西州

歸鎮二首

藍縷長年與最能蒲帆風起峭難勝
新愁決口漂雲甚舊事江湖感慨興
市僧生涯添翼虎災黎世業掠
魚鷹誰將歌舞高臺月分作流亡破屋燈

計於耶匡
廬之役過
淮今距十
五年矣

幾載河臣去若梭後來底績欲如何
司農正苦銷金甲水伯奚緣捲白波
馬策可從霄漢度民田不敵鷺
鷺多妙麻姑見淺清當近旅館孤斟一放歌

贈夏敬孚侍御同年

旅鐘敲破夢遑遑猶記逢君雁塔初
鍊藥曾煩勾漏令起疴舊抱越人書
宣公章奏違烏府劉向編摩罷
石渠慚愧故人丹鼎熟三生烟棹訪茅廬

阮亭日讀一結有
葛洪川畔之思

清揚店題壁

茅店三楹牆乍泥呼童濡墨恰無詩
蒯緱掛壁車來晚襪被堆床客卧遲
豈有安卑初結社依然沽酒共圍棋
清霜未落西風暖記取淮南九月時

金陵二首

浦城帆發曉雲沉此去溪山好共尋
佛殿披緇宮監相健兒走馬御街心
來看賜葬勳臣廟一過安禪祇樹林
把酒鳳皇臺上望紅塵車騎正駸駸
荏苒孤舟客再來櫓聲咿啞鴈聲哀
土仍吾土青帘改人是前人白髮催
王謝舊家桃葉渡蕭梁世業雨

花臺請看六代興亡後
潮打石頭城又回

阮亭日又
夢得也

西湖三首

開樽湖上弔鴟羹此老生平諒獨知
探討三茅將問藥逢迎雙戟頓無詩
霜柑入市偏經眼灰酒沾唇動損脾
吳越山川渾似昨葛洪澤畔牧牛兒
一笑江子杖屨輕十年好夢太勞生
畫圖索駿西湖志幕燕營巢南渡城
客自蕭閒寧待鶴花當剪伐久無鶯
惟聞後舫笙歌發乍似飛來石有情
兩宋三唐休便休幽人泉石足風流
水田補綴山僧衲畫軸煙雲鈔客舟
鶴頂長成兒遺種梅花開放錦

志靈堂詩卷六
纏頭此間惟有林和靖頗怪蘇娘共一丘

阮亭日字字
酒脫有風趣

宿天竺

蠟屐空山便有情蘇堤况起馬蹄輕人乘宿願來初
地天許閒遊放曉晴九里松殘惟弔古三生石在莫
寒盟精藍宴坐渾無寐看月初生魄漸盈

贈許竹隱郡丞

霜落吳門出越關錢塘蘭棹水雲閒西興渡口斜陽
外南鎮碑亭暮靄間輿馬風塵資敬叔道林經卷過
蕭山禹陵樽酒橫橋上記取扁舟夜火還

劉生座上再用前韻四首

漁扉入夜可曾關尚笑鳧鷖未解閒王謝文章霜
裏陶朱事業水雲間嘗聞鑑曲難爲水除却蘭亭不
似山宛委藏書知有在好探金簡共人還

經冬鳥語尙關關箬笠詩瓢好是閒蘆荻蔽天舟一
葉松篁掩逕屋三間辭官范蠡歸何水保楮夫差尙
此山莫似子猷乘興盡故人未見便空還

仙霞南去築巖關組練雲旗報已閒羽檄正飛催巨
艦軍書何日罷行間孝侯燈下長橋水處仲樽前建
業山好祝陽春催露布同人鼓棹凱歌還

事

時座上方
演周處故

霜鞋落木扣松關始識人間鶴鹿閒不爲浣紗來響

元龜堂詩卷六
五
屨豈因蓴菜下雲間旗亭買斷無憂酒藜杖登殘木
假山歸去吾廬詢句曲三茅好問大丹還

阮亭日唱和數詩皆仙人語不似食烟火者

贈鯉魚橋主人

吳越輕舸泊水關主人院宇自高閒諸君合置雲樓
上此子或宜丘壑間木榻留賓棲鳳竹晴窻對客卧
龍山鄭莊驛舍渾無厭直住平原十日還

贈王綏山副使

金門音跡付踈慵頗憶同遊聽曉鐘西子湖邊芳草
暮丈人峰下碧雲重連床快語三天竺並馬晴看九
里松慚愧杜陵無此句與君相見太從容

憶山陰

苧蘿溪口舊蘭亭山色蒼茫霜樹青不見美人留粉
黛空傳道士寫黃庭近城竹密晴雲黑過市船多港
水腥極浦漁舟雙短棹寥天孤鶴一修翎

阮亭日雙結老氣

贈王綏山

平津不厭惡賓乎對使開樽日又哺弔古聯吟歸畫
舫看山行酒命僧厨真成故事三生石快讀新詩十
斛珠幾載相逢勤問訊喜君子弟有封胡

贈阮生

好山晴日似初春拄杖青鞋事事新自是竹林逢阮

籍不關採藥得劉晨長歌痛哭皆奇士美女神仙亦可人檀板一聲高韻發桃花潭水認前身

步西湖堤上

煙雨笙歌總不宜蕭然杖屨此蘇堤西陵墓木飛烏鵲南渡宮牆立鷺鷥卯酒市樓沽飲後午參隣寺打鐘時始知晴日閒來往倒影湖山返照奇

贈戴岫瞻京兆

息肩襍被感居停十載離群見典刑東國傳經儀禮註西湖高卧少微星與僧結制山留杖對客開扉水浸亭翻笑子猷無意緒剡溪纔到又揚舲

雲棲

暖日肩輿復杖藜沿江一逕指雲栖山連和靖藏梅塢水出巖光隱釣谿在句床座風高墳院古松篁影暗法堂低十年夢覺西方意七筆勾詞感舊題

靈隱寺

南宋陵園付劫灰鐫崖古佛亦莓苔諸天鳴磬泉皆應絕壑聽松響易衰占此溪橋圖像在清人魂夢畫屏開遠磨東度山無主意嶺如今悔不來

戴岫瞻水亭贈別

晴日蕭齋暖復晴臨岐絮語倍分明坐傾新釀松醪熟起看寒梅笑靨生郎舍再來如故識奚童曾見亦歡迎於今始識王猷意安道相思爲有情

封嶺上人養母詩

旅食江湖臘盡天開君菽水意悽然誰云大士維摩
詰自識前生目捷連身世香竿春澤外晨昏煨芋火
爐邊笑他東海延年母歸去為兒掃墓田嚴相國諫
之曾孫也

阮亭曰
大好詩

戊午元日武康同念東先生

賭酒傳柑失曉鐘淡雲已覺日矇矓平添歸興鱸魚
外細聽民情爆竹中久客尙留歌歲暮乍晴微雪驗
年豐片帆明日東風便定危推窗雨打蓬

阮亭曰元旦有此
閒人有此妙作

留贈露筋祠主人

伍越潭南風雪殊露筋祠下旅魂蘇流亡難狀鴻棹
渚批販何堪豕負塗行不得歌泥滑滑須何時樂年
烏鳥老年胃濕諸情減銷夜蓀蒸倒一壺

寶應懷孫樹百給諫

蕭蕭醉艇火雲隈憶昔諸賢文社開扁豆花繁歌笛
發葡萄葉暗羽觴催山川如故鶴難認指爪無踪鴻
再來焉得河陽賢地主甘棠樹下酒盈杯

宿王家營二首

送子今朝已渡河投鞭真欲斷春波難忘水國松篁
草畢竟中原天地多烏語慣聞通譯使蛟人常怪隱
漁蓑漕艘不至新挑急未審波臣意若何

故園春半數歸期。簷鵲蛛絲知不知。雨雪荒臺漂母
廟烏鴉老樹露筋祠。五加皮酒難謀醉。十樣蠻箋且
賦詩。自是尋常垂釣客。淮陰市井漫相疑。

宿中興集

摩娑雙眼醉初醒。乍見湖消麥隴青。縮地名園終偃
窄。淨家高士太飄零。竒逢南鎮兼靈隱。薄倖西谿與
洞庭。惟有慧泉隣圃水。回思灑灑耐人聽。

阮亭曰與名山繾綣如此真我輩性情未可爲外人道也

青駝寺宿

纔近瑯琊便有情。非關林壑舊曾行。沿村吹角牛羊
下。向曉聞鷄桑柘鳴。河北人情原樸畧。山東地界故

寬平。休勞更問般陽好。但道何溪水不清。

早行入萊蕪縣

吟鞭打點扣柴扉。日說當歸已早歸。青石關高通鳥
道。蒼龍峽轉抱漁磯。護泉禁樹依山老。行雨勞雲貼
水飛。昨夜燈花應有兆。休嫌春仲鴈來稀。

辰爨梁莊二首

泉清山轉水潏洄。笑指吾廬三逕開。煤比帝城通夜
火。酒分仙府隔年醅。梅花盼望今春艷。竹樹悽愁昨
雪催。俱道客歸經五月。祇疑人夢武林回。

梓潼山下有茅廬。萬里歸心已倦歎。手自種花兼釀
酒。日先趺坐後觀書。麥收使越裝難並。稅畢通侯貴。

不如封戶蠅牛聊自好藥鑪丹滿舊疴除

將泛吳越預作太平詩

露布頻飛遠近呼舍毫預寫太平圖懸瓠池得吳元
濟細柳營歸周亞夫海上瞻黃新詔誥山中返黑舊
髭鬚吟詩何事偏關切官復堂封國免租

補綴

布衲青鞋尙未殘欒欄補綴破蒲團將探阮肇逢仙
洞欲上巖光鈞隱灘未必三山風浩浩不成五嶽路
漫漫祇愁雲外金庭館縹緲天橋去住難

阮亭曰如此胸次真有振衣濯足之樂

歸來

此去巖陵訪故廬歸來重訂晦菴書傳心端屬程明
道正誼無如董仲舒小技雕蟲才已盡短衣射虎氣
全除昇平有待雙鞋健檢點名山定起予

陽丘城北水村

女郎山下本丘樊百脉泉流清遶門隔岸芙蓉低蔭
寺臨溪楊柳密成村投竿不離蘆花港禁足真如祇
樹園過客好拈書籍賣携家來住水雲屯

送張恭壽北上

長安跌坐隔緇塵濁水蓮花簇簇新九列尊嚴爲會
友七真師弟本鄉親星辰歷落通仙界海嶠參差結
地隣梵志此回生羽翼重來不是舊時人

阮亭曰較錢唐蘇小是鄉親何如一笑

送田子綸學憲之任江南

錦帆高颺過江輕朱節三吳送曉征掉鞅那辭司鼓
角臨軒本意謝鴻名臯比鄒魯橫襟坐手版機雲卻
步行御筆親除詩句在傳聞特與此韓翃

憶五畝園中小臺

塵勞誓斷不相關浮世何人若此開花塢披圖尋繭
室露臺把酒對費山林清搖落諸峯見稅畢行吟萬
慮刪寄語蒼頭休懶漫梅開南望主人還

蒿里山下訪祖珍禪師

山館題詩坐夜分幾回書札念離群披來蒿里雲三

徑放下青州衲七片竹樹垂陰留繾綣巖泉出谷送
殷勤相逢又作秋堂別向晚清鐘何處聞

泰安道中

高峯南北似巖關南下諸泉又北還直透聖林皆逆
水曾棲孫復是神山金風玉露天猶熱斗笠青鞋意
自閒最愛垂陽陰半頃清流薄浴石潺湲

雨止

徂徠新甫白雲收膚寸能消萬戶愁七十二泉南旺
開八千餘艦北神州滂沱未必周鄉國消息誰能報
遠遊應信諸溪皆赴海此間滴滴灌漕流

雨中

濃陰偏與路人宜，重宿敖陽路未岐。
雨伯闐闐催陣鼓，風師習習颭靈旗。
捐除紈扇非秋意，拂拭桃笙有夢知。
助我吟詩驢背上，山頭山脚一絲絲。

蒙陰道上憶念東先生

前歲逍遙事采真，一時瓢笠應緣身。
公爲安養修行侶，我亦湘潭憔悴人。
湖上旗亭閒對酒，江邊風雪坐垂綸。
祇今先世牛眠處，尙有衰宗共結隣。

敖陽

濟南已過過敖陽，十日南征却近鄉。
馬省解鞍曾繫樹，人尋沽酒舊眠床。
天空雲影連峯黑，雨歇秋原返照黃。
大好東蒙山色裏，遠林如薺晚蒼蒼。

念東先生送余南行詩二十首內有屢渡黃河

笑故吾之句寄慨良深因廣斯意作六首

似與陽侯唱別離，船頭醜酒自吟詩。
桃花浪發司空事，瓠子歌成漢武時。
顧影幾回鴉鬢改，臨流三嘆黼緌知也。
憐積石清何日寧，獨蹉跎有所思。

一錢不敢昧波臣，照影迢迢意思新。
我自調心卿莫問，君從呼馬阿誰嗔。
洮陽破浪嫌無狀，師德登舟定有神。
卻喜長年頰致語，雙纏鶴首坐何人。

紛紛蘭棹似星羅，鼓掌中流一浩歌。
瞥爾賓朋猶我在，思之爛熟較誰多。
尊前不少揶揄鬼，畦上常逢春夢婆。
留得故吾憑笑傲，將還二十渡黃河。

挽將濁水認頭顱無此鬚眉不丈夫足下三山徐福
展胸中五嶽尙平圖周旋久矣我非我寂照悠然吾
喪吾話到沃焦愁欲絕桑田翻恐笑麻姑
蛇神牛鬼不知音刹海惟存此素心白髮蕭騷留鶴
舞紅顏天好對花斟遠公偏重陶元亮佗度常懷支
道林敢迺迺交無面目虛空螺髻渺難尋
舟師且放櫂歌徐河伯垂慈一上書 聖主不辭沉
我壁下民何罪聽其魚金龍廟祀年年盛清水潭開
歲歲殊願似酸寒無變相燒歌直送報天儲

雜興再和孫作庭侍郎韻六首

舊館依稀客若歸清秋莫遣素心違江鄉廢浦惟蘆

長漁父全家得鯉肥河伯忌成功九載僧伽喜說飛
三衣石尤作意逗留甚不分來帆片片飛

白鷺憑飛帶雪濤擎天自有負山鼈多年願力仙難
遇此日閒情福易消坐倚烏檣占燕尾行尋村落認
魚標淋漓一夜看洲勢蘆荻爭如釣艇高

估客商量水捺添方舟不得雨纖纖閒艙晴望開窻
好列肆泥塗着屐嫌點鼓數聲船婦喜扳罾一帶老
龍潛蒼茫日落桅俱落吳語連翩問酒帘

入覲藩王隔驛聞燕香宿處尙氤氳歸朝自識驅龍
氣過市初無虎豹群霄漢寧辭垂雨露尉陀可欲附
風雲昆明早晚除黃屋御壁同來論世勲

劉阮雙鬟不可逢。扁舟聊復采芙蓉。洛神賦漫臨前浦。童子參當歷別峯。羽背行雲笙若鶴。堂頭說法杖如龍。木蘭院裏題詩在。回棹重聽舊夜鐘。

宣房負土漢公卿。三策虛勞問賈生。河道淺深關積貯。海門通塞費經營。能令水伯無壅土。寧獨淮陽事耦耕。但守司空遺訓在。佗圭依舊告平成。

過淮南第一山憶丁巳同遊兩先生

長淮無恙布帆收。水漲風生幾許愁。餘日正堪憐赤子。此行差不負清秋。隔山寺樹章章見。入谷厓泉澗澗流。惆悵舊遊那可共。柳陰與上采菱舟。

感懷

歸去長林占一谿。山堂準在孝河西。三偷桃笑東方朔。五殺皮憐百里奚。絕口毋勞司月旦。冥心祇自禮雲栖。菟裘松竹常隣近。示疾微煩一枕藜。

莫踏峯前與水前。森森花木卽牛眠。未能遣破塵情耳。不過還如晝夜然。窻穿豈勞從二仲。英靈安用錮三泉。闍浮自有韓擒虎。未定冲昇葛稚川。

燕湖南下

維舟東下霧濛濛。樂事休乘破浪風。豈有遊裝懷陸賈。免教閉閣笑揚雄。齊梁故蹟輕帆外。吳楚分疆細雨中。指點江山渾不信。訴來嘆煞老漁翁。

贈張卽公郡丞

住舸三山古帝畿如今五馬故人稀常懷姑射神仙
洞今上青蓮供奉磯風雨兩帆知義重江湖雙節柰
心違詩篇細讀油然醉頗悔從前易別非

長年王老教其兩孫誦詩賦贈

一葉雲山不買村乘秋往往離吳門石頭城下歌衰
祭下那橋邊弔許渾有子操舟惟擬柁無家繫纜好
開尊卻聽後舫閒功課詩卷高吟教兩孫

阮亭日如此長年三
老士大夫所不及

慧山秦園

種竹無山不與衍有山無此水潺湲蒲團臨壑聞聲
坐枕簟分松轉影眠清嘯不離巖石下屐痕常憶樹

堂邊祇宜湮塞南亭井重注秦園第一泉

慧山泉 有引

中泠慧山二泉本出高原當人跡未經時定
嶽崎磊落可喜不知何物庸流甃井覆亭爲
山川之辱倘後有好事者決井毀亭洗發出
太古面目䟽鑿之功當不在神禹下矣

兩泉母復辨喃喃重與殘秋卸片帆誰始茅亭添石
甃雖云溫滑勝江醜澄泓原自來高澗削鑿終當出
舊巖引入僧房憑去處上頭一任種松杉

青山從不慣媚謨杯切人忍使林泉亦失真野老偏能
供土木庸僧爭識愛嶙峋非緣大展摩醯眼豈易終

全清淨身畢竟生公稱解事至今頑石與誰倫

過齊門

野人不識館娃宮取道金昌亭子東烏桕蕭蕭蘆葉
雨朱欄絮絮桂花風虎丘數面松陰見鶴市千家伎
舫同寄語吳儂須辨取夫差可使讓梁鴻

松江何籛壽同年道村居之樂

近郭魚腥雜市塵遙村紅樹逼秋新還來脫粟同知
已更不餘錢奉要人往事回頭嗟芻側九切狗前賢掉
臂憶鱸葦此間籍籍推陶峴雲水三舟自在身

優曇園贈許蕪使鶴沙

幽檻微頰迎送勞有時佇立遣人招深林翠羽飛難

到小隊紅牙按不羣宴坐憑風開瑣闥閒眠聽雨浸
橫橋蒼隄縱落銀濤險可敵滇南北望遙

關山亭子唱勞勞不為悲秋賦楚招閉閣楊雄休寂
寂封侯李廣漫囂囂且從羊仲開三徑莫數將軍第
五橋典發杜陵添故事生平誰憚馬蹄遙

二陸舊井

殘秋顧影百回思古甃山門一杖藜賜第悠悠迷姓
氏高扉徃徃化招提銀瓶素綆無消息瓦鉢清齋有
別離諸陸雲坊安石壘我來下榻每題詩

贈韓武康樾依

紫薇青瑣待華簪漫向東堂戀苦吟一隊健兒隨射

虎兩行書記候鳴琴銘功想在銅官嶺製錦何如烏
柏林別日前溪聽子夜霽然水石激清音

阮亭日洵如所
言何慙仙吏

同韓燕翼張可積許靜修宿資福寺留別靈機

禪師

屢見鄉人說梵宮坐間閒適證宗風定中歷歷聞香
板眠後燠燠悟火籠自昔祖庭推大慧於今行輩首
天童好從拄杖探消息病後支離似懶融

贈葛仞上先生

制義童時重縹緗巋然何意見靈光堯臣已識東方
朔商室長存李伯陽 玉詔未隨開史局金庭端許

逐仙梁年年高卧君知否館閣誰人不末行

四明留別姚佩若中翰

匆匆十日招攜外最喜鳩江見大兄五嶽尋真無那
遠四明賦別若爲情辟疆園內松筠色招寶山間風
雨聲病後清齋恒獨醒誰能不飲與公榮

釣臺詩

兩月愁爲二豎侵連朝又復動狂吟冬青半是香樟
樹晴雪無非烏柏林三泖鱸魚誰敢問四明花露未
曾斟清齋但有登臨好欲訪桐廬力不任

贈謝文侯

梅花釀酒醉晴春鶴髮蕭騷謝茂秦太傅宗風知後

志齋詩卷六
齋右丞筆法認前身千秋鑑賞人難老百衲雲山業
不貧我作新詩君作畫幾番佳士共題真

姑蘇病中謝世詩二首

殘形苦我亦多時從此哀蟬與殼辭厭世頭陀無恨
事哭人於越索佳詩雙旌自囑隣和靖尺碼誰堪累

仲尼

延陵事

廿載今朝占得力禪天貝闕信君之

故園歸夢萬重山百慮全拋好是閒架上新書難遍
讀階前冗竹語誰刪已拚卜夏修文去不意中山醉
酒還死後重生君信否可知末後透牢關

贈李鄴園制府

爛柯山下建牙新犄角三方布算神諸省於今瞻幕

府九天從此重儒臣陰功武惠爲前輩封爵文成似
後身誰敢公然傳羽檄招回無數亂離人

三衢西郭三首

善財行脚苦無倫旅舫偏能意思新紅樹經冬初賜
紫青林帶雪更回春瞻星估客爭開纜落日漁郎自
結隣最是龍游鉦柝夜蕭蕭細雨駐江濱

干戈已定泛雲航戍卒閒行罷守塘遙樹近山韋偃
畫疎松叢竹戴逵莊祇愁戰後無鷄犬誰信鴻歸有
稻梁爲道盧循終寂寞征南殺氣滿餘糧

鎖纜浮槎水拍天漁翁普放捕魚船碧潭網舉齊張
籠翠浪鷹飛亂扣舷冬在巖陵枯木外不離梅市蓼

松邊斜陽未晚相將去半與征徭半酒錢

阮亭日只舉一事章法老橫

舟發衢州府

登舟翠靄已相迎下水潺湲自在行山喜桐廬添雪色江如金甲破軍聲羊裘無恙非寒士脫粟何奇動旅情記得來時愁急瀨回橈箇箇與鷗輕

龍游二首

漁戶龍游聚小巖放鷹信口唱喃喃風生遙浦飄櫻笠雪重晴灘曬布帆作圃有懷成罨畫渡河無法種松杉西溪欲至須春半斟酌家書待一函

阮亭日風土話別

傳道家園又薄收江鄉聊可復淹留寧因病酒傷時暮自為尋梅賦遠遊兩越山經千折水三吳鰲政百花洲同儕卻憶王喬鳥謂緱山寂寞何方葬土丘

泊窄溪埠二首

拄杖行吟澤畔徐傍人錯認是三閩那無米桶容船婦豈有漁童主釣車長路情多皆物外少年習盡似生初幾回應死今還在荷鋪名山任葬渠
抽簪早歲返柴廬笑倒人間李左車螺祖傳為遊士祖蠹魚一字喫書魚癡狂祇道批鱗易老大方驚禁網踈賈傅屈平前日事沉湘墜馬總何如

過富平宿平安橋

楸枰戰罷酒微醒曾把吳鉤最不平
意氣肯容推劇孟時名爭解讓
虞卿長林霜落青松色遙浦波寒白
鷺盟向晚蓮花聽玉漏夢回真覺世
情輕錢鏐舊蹟動人思綠雪晴瀾下
海涯率爾全圖歸國日悠然萬弩射
潮時經年不改江神懼異代猶存父
老祠讀罷班彪王命論庸奴百喙復
何辭

泊錢塘江二首

尚平五嶽有前期一一圖成類畫師
結綺臨春陳後主屨廊香徑越西施
牆陰盡是篋簾谷市語無非詰曲詞
重到吳山如故否爛柯歸後頓生疑
丁巳年冬汗漫遊湖心寺上六蘭舟
旗亭詞客高常

念侍東

白裕山人李鄴侯津摩詰當歌偏曼衍山戴顓

攜酒最風流

帖於今兩地遙相憶若箇題詩翠幕樓

吳山有孫氏樓方邵村侍御題翠
幙二字向嘗與孫樹百給諫同登

吳山除夜二首

兼旬雨雪壓初春此日溪山倍可人
世外年華無俗累客中談笑有高
隣崢嶸蛇尾歸雲壑晴霽鷄竿望
玉宸鉦鼓兒童敲夜夜花幡金勝
一時新凍合西湖畫舫稀祇今冰
滑釣魚磯曉鷄唱徹花應發歲酒
歌闌客未歸取醉隣槽還滴瀝乍
晴晨雪又霏微六幺簫鼓時時盛
春事休教與願違



阮亭選志壑堂詩卷之七

七言律

淄川 唐夢賚

辛酉元日

歲事湖涯慢不修
元朝大雪臥蒙頭
那無除地祭獅
座早不朝天拜鳳樓
客子呼盧成磊落
使君致酒競綢繆
特書好借春秋筆記
取同人聚越州

元日再賦

晏起吳山類僻村
春風消息動梅魂
北歸浦口巾車
在南渡湖堤風俗存
藍尾當筵歌玉樹
白頭對酒笑銀幡
同人俱有尋春約
莫便輕橈憶故園

和張可績

聞道姑蘇客問津故廊響屐久成塵支硎黛色全經
雪河渚即武林西溪梅痕已綻春玉粲登樓偏作賦
梁鴻舉火漫因人家圍忙煞椒花頌輸與吳山自在
身

周雨文邀觀燈同介菴香岩靜修分韻得花字
良辰儼屋住山家結約東園待月華撾鼓將催春雨
散燒燈不分暮雲遮升菴酒後歌雙髻許蜡狂來泛
九霄俱醉醇醪還顧曲各翻樂府對銀花

西溪看梅花二首

風俗梅花種舊溪吳王城畔聖湖西田家望與秋成

急陌上香分竹樹齊南國登臨晴不易北人驚叱醉
相携羅浮酒肆知何在似訪漁郎路乍迷
迢迢秦亭山下村扁舟容與易黃昏齋壇不失蓮池
戒園圍如聞和靖存茶熟因僧留下榻花開為客夜
關門挑燈賭墅渾無倦玉版新叅仔細論

贈余澹心處士

芒角天垣姓字寒吳山邂逅此盤餐難忘黑子談高
允不出蒼生笑謝安話到奇人多痛哭聚來客邸易
清歡王充著述盈三尺肯借中郎一再看

贈方樓岡學士

北門瀟灑別金階癡絕三閭願易乖常念關山歸皂

帽忽逢吳越入青鞵
榻來海屋還封待用白老去高
峯好活理凝碧池頭添故事却嫌摩詰費吟懷

李長白大叅復招飲

驛騎留賓說鄭莊於今烏府數飛觴李前平泉再過
知花石鄴架還臨對縹緗既醉徧携仙掌露瀕年分
餉禹餘糧龍圖門下原多士却識交情重渭陽

贈李嵩岑撫軍

金闕丹臺舊有師西平清節九天知中原幕府群相
望早歲詞曹薄不爲緩帶投壺羊叔子開樽置驛鄭
當時可從放鶴銀籠日借取水桃示術奇

送高節培歸里

忠憲遺風起慧陽逢君猶似見靈光門庭允簡推元
禮氣節從容憶范滂且喜龜山籩豆在還聞首善講
堂荒中丞便是延平李第二泉流惠澤長李嵩岑撫軍爲高學

憲公門人

王信初少卿見招先投以詩二章見謝小酌依

韻和之

元直登床舊不拘朶願今日報雲厨精魂恰共三生
石潦倒驚存七尺軀畫舫西湖蕭寺外吳山南渡古
城隅不知黃久倪迂輩圖寫生綃似此無

送嚴方貽侍御北上

金甌無恙版圖新善後機宜賴近臣露布高飛知事

定滄江外臥念時貧何能仗鉞三軍者倡作躬耕百畝人當宁常愁民力盡烏臺莫厭奏章頻

阮亭曰五六見經濟不應作聲律觀

午日寄懷李鄴園制府

雨歇初曦照寺樓紫陽山館類清秋棲遲於越人將發歌舞昆明報已收蘭籍似來聽浴鼓軍機偏改競湖舟漫勞繫絲銷兵甲元凱旌旂駐上頭

西泠橋上觀龍舟

六一泉邊書畫樓重來屈指四春秋山晴粉黛粧初出潮落英雄氣已收旗幟疑開金鎖甲鼓鉦全動木蘭舟分明水戰前人法祇少伊涼唱換頭

送信初歸仍用前韻

寓齋竹樹拂隣樓賓客相過有奕秋顧愷當窻花影亂桓伊薄暮笛聲收兼旬並苦黃梅雨刻日分歸櫂李舟最是酒闌歌發後聯吟彷彿鳳池頭

壽春菴遇孫海門刺史

吳山雨霽起微寒瞥爾相逢憶故歡曾道麒麟傷網罟不問麋鹿愛衣冠篔簹谷得禪天樂祇樹林無行路難文正名泉依舊在寶蓮池上試來看

贈海水

鄧禹欺人笑老兵丈夫二十未成名黃金北闕方招隱白鷺西湖且罷盟水郭牽舟分袂色山堂下棹讀

書聲好留醉墨題橋柱也道從今萬里行

陳用亶堯夫沈宏畧移樽過寓中同海木賦謝
門外頻來長者車故人相見勝雙魚睽離多在歸山
後意氣徧成識面初珠館壺觴增感慨瑤臺鐘鼓報
清虛到來往往成高譙却悔河梁問訊踈
西風薄日鴈行斜襪被經年嘆物華拄杖過頭皆是
客綈袍煖耳漸成家狂吟寧敢稱三影爛醉何堪泛
九霞便羽衛陽應有信遣歸猶見滿籬花

贈張擎菴因及海木

白髮高談定起予閒來揮淚話生初秦城不與歸完
璧涓水何緣載後車馬角烏頭今已矣水天雪窖更

何如世間更有傷心事狗監無人薦子虛

送周介菴太守歸

放棹嘉禾秋雨微凄然旅邸送君歸人過北固鐘聲
發帆落東林木葉飛作客經年書畫滿到家晚圃芥
菘肥不須悵望同遊者但掃寒山舊釣磯

和吳幔坡見贈詩

長揖頻驚玉笋班知君詞賦滿雲山棄繻年少才偏
壯運斃身勞意正閒綠酒樽前傷閱寂黃金臺下費
躋攀秀才事業推文正翻在窮愁畫粥間

幔坡將之姑蘇坐中贈行一首

彌勒龕中賦卜居季鷹那定戀鱸魚苦吟連日愁蔬

筓並舫明朝入闔閭。豈有黃金招樂毅。不妨白馬弔靈胥。河橋青幔聊成醉。記取禾城落照餘。

答曹尚白見贈

拄杖披尋越絕書。相逢道院正秋餘。七言屈子離騷後。八法羲之擲管初。坐隱不辭紗帽側。清齋莫遣酒杯踈。知君有意澄江上。或向巖陵一釣魚。

巖州

指點歸雲沒斷鴻。蘭舟此日又浮空。新頒白帝干林紫。欲傲花王十錦紅。處士不離茅舍外。神仙多在亂山中。漁翁杯酒知何意。正掛孤帆趁好風。

衢州作

山開水漫顛雲徧。蘭漿蕭閒戰血枯。坐可呼盧題彩鷁。行將牽犬獵寒蕪。客留南國開黃菊。鴈與西風捲白蘆。繫纜江干杯酒意。猶然燕市舊屠沽。

阮亭曰五六與少陵南菊北書一聯并有千古

重過南湖

南湖猶是看花船。沽酒還來擊小鮮。客子壯遊情汗漫。鄉人惜別語纏綿。重經構李耆英會。漸近楓橋橘柚天。座上鄒枚皆好事。那無詞賦滿山川。

中夜雨作不寐

窮年嘗戴遠遊冠。不爲山川行路難。於世那除名士氣。調心祇作閉關看。反裘未必爲供爨。載壁何人亦

具餐珍重家書無善狀浮籤兩字署平安

過宿遷

路出江淮盡此城偏疑月近故鄉明隔年再與陽侯
別明日初爲泰岱行白帝已知收稼穡司空何計奏
平成故園歸去幸求在得意圍爐歲酒清

沂州曉渡

過山今又過沂城古道驂騮曉日明豆粥漸香人讓
座酒爐纔沸客謀行瑯琊南渡才偏盛諸葛東耕願
不成但道麗譙樓下水曾臨疏傅照顏清

